

CAROLI MORGENSTERNII, D.

AUG. RUSSIAE. IMP. A CONSIL. PUBLICIS, ORDD. S. VLADIMIRI ET S. STANISLAI EQUITIS,
IN UNIV. CAES. LITT. DORPAT. PROF. P. O. EMER., BIBL. ACAD. PRAEF.,
ACADEMIAE DOCTRIN. PETROPOL. SODALIS HONORAR., REL.

COMMENTATIO

DE ARTE VETERUM MNEMONICA

PARS I. SECUNDIS CURIS RETRACTATA. PARS II. III. NUNC PRIMUM
ACCESSIONE RUM.

D O R P A T I,

EX OFFICINA ACADEMICA I. C. SCHÜNMANNI.

M D C C C X X X V .

LECTURIS S.

Inter omnes animi humani facultates nulla fere est, quae aequa negligentia intercidat, quam *memoria*: neque ulla, quae facilius, si lateat, evocari, quae magis, a tenuibus profecta initiis, augeri atque in infinitum paene provehiri possit. Quantam enim memoria fuisse dicitur SIMONIDES CEUS; quantam THEMISTOCLES ¹⁾, qui oblivionis artem, quam memoriae, malebat; quantam is, qui a Pyrrho legatus ad senatum missus est, CINEAS ²⁾; quantam MITHRIDATES ³⁾, qui, duarum et viginti gentium rex, totidem linguis iura dixisse fertur, singulas sine interprete affatus; quantam SENECA pater, qui duo millia nominum, quo ordine erant dicta, referebat, et singulos versus, quum plus quam ducenti darentur, ab ultimo incipiens ad primum recitabat ⁴⁾. Quam eximia porro et paene incredibili viguit memoria, ut e recentioribus unum commemorem, Corsicus ille adolescens, qui praesente MURETO ⁵⁾ innumera nomina, Latina, Graeca, barbara, significantia, nihil significantia, eodem ordine, quo dictata erant, et inverso, aut quo quisque voluerat modo, sine ullo errore referebat.

His et similibus ⁶⁾ eximiae memoriae exemplis perducimur ad opinio-

1) CIC. de Or. II. 86. de Fin. II. 32. Conf. VAL. MAX. VIII. 7.

2) CIC. Tusc. I. 24. SENECA. Controv. lib. I. prooem. PLIN. VII. 24 locaque ab HAR-
DUINO laudata.

3) PLIN. et VAL. MAX. II. cc. aliique.

4) Ipse praedicat de se Controv. lib. I. prooem.

5) Vid. Mureti Var. Lectiones III. 1.

6) Conf. praeter CIC., PLIN., SENECA., VAL. MAX. II. cc. SOLINUM I. p. 8. ed. PITISC.
Longam seriem, sed nullo plane examine aut dilectu, dabit LAMBERTUS SCHENCKELIUS DUSIL-
VIUS (Ducissilvius, i. e. aus Herzogenbusch) de Memoria lib. I. c. 2. (quem librum olim
inspiceram in Gazophylacio Artis memoriae, Argentor. 1611. 8., iam denuo perlustraveram in li-
bro: Variorum de arte memoriae tractatus sex etc. Francof. et Lips. 1678. Adscribam

nem, quod admirabile hac in re quidam praestiterint, id ratione quadam singulari adiutos praestitisse.

Ac memoratur sane Veteribus *ars quaedam mnemonica*, quam SIMONIDES CEUS invenisse, alii perfecisse dicuntur⁷⁾. Cuius artis quum apud antiquos scriptores passim mentio fiat, eaque recentioribus temporibus quadam modo sit instaurata; nec iniucundum videatur, quinam cuiusdam facultatis animi humani excolendae modus aliquando adhibitus sit, cognoscere: iam adolescens artis illius rationem cognitam habere cognitamque exponere studui, atque ea, quae sum commentatus, cum IO. AVG. EBERHARDO et FRID. AVG. WOLFIO, viris clarissimis, traditis apographis, a. MDCCXC. communicavi. Haec passim retractata proponere placuit formâ prolusionum Indici scholarum in Universitate Caesarea, quae Dorpati constituta est, ha-

litteratorum caussa sylluges perrarae alterum titulum praeclara minantem: „*Gazophylacium Artis memoriae*, in quo duobus libris omnia et singula ea, quae ad absolutam huius cognitionem inserviunt, recondita habentur. I. De admirabili utilitate et stupendis memoriae artificio adiutae effectibus in quibusdam viris praestantiss., ex auctoribus fide dignissimis. II. De ipsa memoriae arte acquirenda, fundamentis, methodo et praxi eiusdem, ex Philosophorum et Oratorum principibus et aliis auctoribus. Compendiose absoluteque et collectum et illustratum per LAMB. SCHENCKELIUM, Dusilvium. His access. de eadem arte mem. adhuc V. Opuscula: 1) Io. AUSTRIACI, 2) HIERONYMI MARAFIOTI, 3) Io. SPANGENBERGII, HERD. (sic), 4) FR. MART. RAVELINI, 5) Io. WILLISSI. Omnia lectu et cognitu dignissima. Ao. 1678.“ 10 fol. numeris non distincta, tum 378 pp. Index 6 folior. Catalogus Pontificum Rom. et Imp. 5 fol. Willissi opusculum laud. 104. pagg. 8. Adde VOSSIUM de Rhetorices nat. et constit. p. 127; MORHOF. Polyhist. lib. II. c. 6. §. 3. seq.; Act. Erud. a. 1705. p. 67; Diss. de memoria memorabili, prae. PEZOLDO, auct. PIELZ. Lips. 1699. p. 20 seq.; alios. Ex recentioribus conf. Io. FRID. CPH. GRAEFFII: Neuestes katechet. Magazin. Vol. IV. (1801) p. 73—89.

7) Antiquissimorum populorum *Aegyptios* praecipuo studio memoriam exercuisse, HERODOTUS II. 77. testatur. Quod WESSELINGIUS bene illustrat ex PROCLO in Tim. p. 31, monumenta Aegyptiorum tamquam memoriae praesidia laudante. Apud Graecos primum PYTHAGORAM constat discipulis inter alia quae sapientissime praeceperit, hoc commendasse, ut quotidie quaecunque egissent, eorum omnium recordarentur, idque eodem ordine, quo quidque actum esset: non hoc tantum consilio, ut ad maiorem sui cognitionem animique perfectionem pervenirent; sed ut memoriae maxime vim corroborarent. (Loca Veterum vide MEINERTIS libro: *Gesch. d. Wiss. in Gr. u. Rom.*, T. I. p. 411—414. Versus Pythagoreorum, quos ex LAMBICHO affert, pliores leguntur *Gnom. Gr.* ed. BRUNCK. p. 108. Locis a Meinerte allatis adde Cic. de Sen. 11.) Sed neque Aegyptiorum, quam Herodotus significat, exercitatio, neque Pythagoreorum institutum potest ars quaedam mnemonica dici: nisi hos, quod quo quidque ordine actum esset, eodem id revocare deberent, artis memoriae partem attigisse dicas, cui equidem haud repugno.

bendarum: praesertim quum ephemerides litterariae tum resonarent IO. CHRISTOPHORI ARETINI, Lib. Baronis, Academiae doctrinarum regiae Monacensis quondam Praesidis vicarii, Bibliothecae centralis regni Bavarii Praefecti, invento mnemonico, eaque quae ab ipso, eius discipulis et aemulis, DUCHETO, GREGORIO de FEINAIGLE, CH. A. L. KAESTNERO, cl. KLUEBERO aliisque illo tempore edita essent, ad nos nondum fuissent perlata. Ordo autem commentationis huiusmodi erat. Prima parte disputaveram de inventore artis iisque Veterum, qui eam excoluisse et consummasse videantur; secundâ artis rationem, quantum potui, ex antiquis scriptoribus hac de re non nimis lucidis ac copiosis descripseram; tertia, praemissis Veterum quo-rundam sententiis, meum iudicium qualemque adieceram.

Casù accidit, ut prima tantum pars, quae momenti paullo gravioris esse mihi quidem videretur, typis traderetur describenda m. Febr. a. MDCCCV. Aliis studiis ad alias res tractandas abductus, quae commentationis meae restabant, per triginta annos, ut alia non pauca, in scriniis delitescere sinebam. Poteram quidem ad ea quae instituissem, absolvenda excitari tum censorum quorundam litterariorum, qui de inchoato opusculo publice ferre sententiam dignati essent, favore, ut HEYNII (Götting. Gel. Anz. 1805. St. 158. p. 1575), BECKII (N. Leipz. L. Z. 1805. St. 153. p. 2441—2443), Censoris mihi incogniti sigla ζ.usi in Ephem. litt. Ienens. (Ien. A. L. Z. 1805. no. 281. p. 381); tum mentione libelli in enchiridiis historiae Graecorum litterariae, ut GRODDECKII, in libris paedagogicis, ut NIEMEYERI, rhetorici, ut HERM. AUG. SCHOTTI, aliorum. Iam igitur seni, antequam proficiscatur e vita, sarcinulas colligere incipienti, hanc etiam opellam, iuvenilem fateor, quodam modo ad finem perductam, data opportunitate expromere liceat, ae-quos arbitros optanti quidem, at severos iudices, ut serus discat, plane comprobans aureum SOLONIS illud: *Γηράσκω δ' αιεὶ πολλὰ διδασκόμενος*, non reformidanti. Scribebam Dorpati m. Febr. MDCCCXXXV.

PARS I.

DE ARTIS MNEMONICAE INVENTORE ET PERFECTORIBUS.

1. DE SIMONIDE CEO.

Leguntur in Marm. ARUNDEL. ad Ol. LXXV. 3. haec:

Σιμωνίδης ὁ Λεωπρεποῦς, ὁ Κεῖος, ὁ τὸ μνημονικὸν εὔρων, ἐνίκησεν
Ἀθήνησιν διδάσκων ἀρχοντος Ἀθήνησιν μάντου.

In SCHOL. vero in HERMOGENEM p. 410⁸⁾ exstat epigramma, quod Simonides in suam ipse victoriam Adimanto magistratu fecit, cuius versus extremi:

Ἄμφὶ διδασκαλίᾳ δὲ Σιμωνίδῃ ἐσπέτο κῦδος
Ογδωκονταετεῖ, παιδὶ Λεωπρεπέος.

His locis, quibus accedunt VALERII MAXIMI VIII. 7. verba: *Simonides poëta octogesimo anno, et docuisse se carmina, et in eorum certamen descendisse, ipse gloriatur, princeps Criticorum, RICHARDUS BENTLEIUS⁹⁾ demonstrat, Simonidis annum octogesimum aetatis cadere in Olymp. LXXV. 3. Recte igitur annum, quo natus sit Poëta, constituemus Olymp. LV. 3.*

Annus vero, quo idem mortuus est, intelligitur ex alio Marmoris Arundel. loco ad Olymp. LXXVII. 4:

Σιμωνίδης ὁ ποιητὴς ἐτελεύτησεν βιοὺς ἔτη ἐνενήκοντα, ἀρχοντος
Ἀθήνησιν Θεα νίδου.

Quodsi Simonides fuit artis mnemonicae inventor, artis originem cadere patet inter Olymp. LV. 3. et Olymp. LXXVII. 4. Hunc enim Simonidem Ceum, lyricum illum poëtam clarissimum, eundem artis mnemonicae inven-

8) Conf. etiam *Rhetores Gr.* ed. CHR. WALZ. Vol. V. p. 544.

9) *A Dissertation upon the Epistles of PHALARIS*, with an Answer to the objections of the Hon. CH. BOYLE, Esq. By RICH. BENTLEY. Lond. 1699. 8. p. 41—43; ait, si mavis, in LENNEPII versione Latina, quae prodiit Groningae 1777, 4. p. 20—22; et in Bentleii Opusculis philol. Lipsiae recusis p. 170, 171.

torem exstitisse, plures veterum scriptorum tradunt¹⁰⁾, nec recentiorum quisquam famae pervulgatae calculis utrinque subductis contradixit.

Qua occasione Simonides artem memoriae invenisse dicatur, narrant CICERO de Or. II. 86, et QUINTILIANUS XI. 2. §. 11, et invenit in parte rei exornanda elegantis fabellae argumentum PHAEDRUS IV. 24. Nam quum esset grande convivium in honorem pugilis coronati¹¹⁾, Simonides, qui ei coenae adhibitus erat, nuncio est excitus. Poëta vix limen egresso, conclave illud supra convivas corruit, atque ita eos contudit, ut quum ruinâ oppressos eorum propinqui sepelire vellent, obtritos nullo modo possent internoscere. Tum „Simonides dicitur ex eo, quod meminisset, quo eorum loco quisque cibuisset, demonstrator uniuscuiusque sepeliendi fuisse. Hac tum re admonitus invenisse fertur, ordinem esse maxime, qui memoriae lumen afferret. Itaque iis, qui hanc partem ingenii exercerent, locos esse capiendos, et ea, quae memoriâ tenere vellent, effingenda animo, atque in his locis collocanda. Sic fore, ut ordinem rerum locorum ordo conservaret: res autem ipsas rerum effigies notaret, atque ut locis pro cera, simulacris pro litteris uteremur.“

CICERO haec ita narrat, ut non primam tantum artis inveniendae occasionem a Simonide profectam tradi innuat, sed eorum, quibus potissimum constat totum artificium, inventionem.

Doctorem artis mnemonicae eundem exstitisse, cogere aliquis posset ex CIC. de Fin. II. 32, ubi dicit, Simonidem aut quem alium Themistocli artem memoriae esse pollicitum. Atque idem fere narrat de Or. II. 74. sic: quendam doctum hominem atque in primis eruditum Themistocli artem memoriae, quae tum primum proferretur, pollicitum esse se traditurum. Doctum vero sapientemque vocat Simonidem de Nat. Deor. I. 22. Sed hanc quidem ratio-

10) Vid. praeter Marm. ARUNDEL l. c. CIC. de Or. II. 86. 87. QUINTILIAN. XI. 2. §. 11. PLIN. Hist. Nat. l. c. AELIAN. de Nat. Animal. VI. 10. VII. 48. init. SUID. voc. Σιμωνίδης, et SCHOL. ad ARISTOPH. Vesp. ad v. 1402.

11) Cui victori scripsit carmén Simonides, (apud SCOPAM coenasse Cicero refert) et utrum Pharsali fuerit domus illa, an Cranone in Thessalia, de eo magnam esse inter auctores dissensionem, monet Quintilianus l. c. §. 14., ubi legenda docta SPALDINGII annotatio. Conf. BAYLIUM (Dictionnaire hist. et crit. v. Simonide. Not. B. C.). DUKERI, praes. GOENSIO (van Goens) defensam, Dissertationem de Simonide Geo (Ultraj. 1768. 4.) nunquam contigit videre. BOISSII librum (Histoire de Simonide etc. par M. de Boissy fils. Paris 1755. 8.) perlustravi quidem, sed frustra.

nem parum valere, quid ego commemorem? Nec ex verbis Marm. Arundel. ad Ol. LXXV. 3., docuisse artem mnemonicam, qui eius fertur inventor, ostendi potest. Male enim BURMANNUS SECUNDUS¹²⁾ vocem Marmoris διδάσκων vertit eam (nempe artem mnem.) docens. Nam ex Valerii Maximi l. c. patet, carmina docuisse et in eorum certamen descendisse eo tempore Poëtam Ceum.

Librum de arte sua ab eo scriptum esse, nemo antiquorum, quod sciam, tradidit. Saepius igitur miratus sum haec praestantissimi Philologi verba¹³⁾: „Artem Memoriae invenit et conscripsit Simonides, celeerrimus Poëta idemque Philosophus.“

Ceterum praeclarâ Simonidem memoriam fuisse, sive naturae sive arti id deberet, refert CICERO Tusc. I. 24. Conf. PHILOSTRATUS de vita Apollon. I. 14. SUIDAS l. c. Ipse vero memoriam suam commendavit his versiculis¹⁴⁾:

Μνήμην δού τινά Φημι Σιμωνίδης ισοφαρίζειν
Ογδωκονταέτει, παιδὶ Λεωπρεπέος.

Laudat eius memoriam etiam AMMIANUS MARCELLINUS XVI. 5, sed singulari modo, ut verba afferre placeat: „Si itaque verum est, inquit, quod scriptores varii memorant, CYRUM regem et SIMONIDEM lyricum et HIPPIAM Eleum, Sophistarum acerrimum, ideo valuisse memoriam, quod epotis quibusdam remediis id impetrarunt, credendum est, hunc (Iulianum) etiam tum adultum, totum memoriae dolium, si usquam reperiri potuit, exhausisse.“ Fuerunt igitur qui existimarent, medicamentis quibusdam ad corroborandam memoriae vim Simonidem esse usum; cuiusmodi medicamentorum venditatores tangi a Quintiliano XI. 2. §. 4. loco quodam corrigendo, GESNERUS putabat.

Haec fere sunt, quae de Simonide, artis mnemonicæ inventore, apud Veteres commemorantur. Quibus acquiescat, quem immemorem esse libet Epicharme iustius:

Νᾶφε καὶ μέμνασ' ἀπιστεῖν κ. τ. λ.

12) Ad VALESII Emendd. p. 85.

13) DAN. WYTTEBACHII, Praeceptis Philosophiae Logicae, (Amstel. 1781.) p. 252.

14) Anal. BRUNCK. T. I. p. 157. Anthol. Gr. IACOBS. 1814. T. II. p. 786.

Nobis quidem CICERO ipse praebeat ansam dubitationis, dicens¹⁵⁾: „Vidit hoc prudenter sive Simonides, sive alius quis invenit, ea maxime animis affigi¹⁶⁾ nostris, quae essent a sensu tradita atque impressa“ etc. Nam quo minus verba sive alius quis invenit sumamus de sola imaginum vi observata, nec de arte inventa universe, vetant quae allata sunt ex Ciceronis capite 86. extremo, unde pateret, non locorum tantum capiendorum, sed etiam imaginum in locis collocandarum rationem ad Simonidem esse relatam. Quid? quod QUINTILIANUS etiam¹⁷⁾ dubitanter loquitur: „Ex hoc Simonidis facto notatum videtur, iuvari memoriam signatis animo sedibus, id que credere suo quisque experimento.“ Simonidem ipsum notasse non dicit, quum ante, §. 11., illud habeat: „Artem ... memoriae primus ostendisse dicitur Simonides.“ Ac sane inventionis historia eiusmodi est, ut mythici quiddam insit. Narratur enim a Cicerone, Quintiliano, Phaedro, quod ante prudens omisi: quum pugili coronato illi carmen, quale componi victoribus soleret, mercede pacta Poëta scripsisset, abnegatam ei esse pecuniae partem, quod more Lyricorum digressus, in laudes Castoris et Pollucis exiisset: quapropter partem ab iis petendam, quorum facta celebrasset. Quos persolvisse. Nam nuncio illo excitum esse propterea, quod eum duo iuvenes, equis advecti, magnopere evocare dicerentur. Surrexisse illum, prodisse, vidisse neminem. Fuisse tamen gratos erga se Deos, exitu comperisse. — Sic proditum est. Recte tamen iam QUINTILIANUS¹⁸⁾: „Quamquam mihi, inquit, totum de Tyndaridis fabulosum videtur. Neque omnino huius rei meminit usquam Poëta ipse, profecto non tacitus de tanta sua gloria.“ — Quid vero? si dubitando amplius progrediamur, omnemque de Simonide, artis mnemonicae inventore, narrationem maxima ex parte fabulosam dicamus? Quantum quidem artis ratio apud scriptorem Rheticor. ad Herennium, Ciceronem et Quintilianum appetat, Sophistae potius argutiam, quam antiqui vatis ex

15) de Orat. II. 87.

16) Sic malim quam, quod tuerit ERNESTIUS, effingi, quod librariorum errore hoc tractum mihi videtur ex voce effingenda cap. 86. extr. (Scripsi a. 1790, edidi 1805.) Affigi video edidisse etiam ORELLIUM a. 1826, Cic. Opp. Vol. I. p. 328.

17) XI. 2. §. 17.

18) l. c. §. 16.

Gnomicorum illorum aevo sapientiam agnoscimus. Haud absurdum certe foret, etiamsi alia argumenta deessent, suspicari, artificium istud tantum non omne a callido quodam Sophista Socratis aetate esse excogitatum, divini autem vatis auctoritatem¹⁹⁾, ut saepe, praetentam, quo praeclarior rei novae species obtenderetur. Quod ad SIMONIDEM maxime res referretur, dici potest, inde fluxisse: *primum*, quod ille olim, quum epularetur pugil quidam coronatus, et conclave forte corruisset, inter ceteros oppressos convivas sospes, ordinis, quo quisque discubuisset, memor, obtritorum propinquis, qui suos discernere non possent, demonstrator uniuscuiusque sepelendi fuisset: (nam hactenus certa res, haud ficta, tanquam fundamentum, omni narratiunculae subesse videtur²⁰⁾); *deinde*, quod Simonidem ipsum memoria suam octogenarium disticho celebrasse constaret. Quod ex mercedis pactae sordide negata parte Deorum, eorumque Deorum, qui ipsi gymniconum certaminum exemplaria et praesidia perhiberentur, Castoris et Pollucis, ira duceretur, in eo haud scio an plane deprehendamus avari Sophistae, mercedis pactae religionem aequalibus quovis modo inculcantis, callidam fictionem.

II. DE HIPPIA ELEO.

Quis fuerit Sophista, qualem volo, si quaeritis: non procul est, ad quem aut huius partis fictio, aut saltem prius fictae creditaeque commendatio, atque adeo artis mnemonicae, quae quidem ars quodam modo dici possit, inventio non sine probabilitate referatur.

Scilicet primi auctores, qui artis mnemonicae faciunt mentionem, sunt illi PLATO et XENOPHON. Hic enim in *Symposio* suo²¹⁾ Socratem facit Antistheni dicentem: οἶδα δέ σε (sc. Καλλίαν τούτοι προαγωγεύσαντα) Ἰπ-

19) Quam eximia floreret Simonides auctoritate, vel unus PLATONIS locus in *Politia* I. p. 331. E. ostendit: Ἀλλὰ μέντοι, ἦν δἰγώ, Σιμωνίδη γε οὐ φέδον ἀπιστεῖν· σοφὸς γὰρ καὶ θεῖος ὁ αὐτός. Inter nobiles Ceos Simonidem nostrum nuper (1826.) cl. P. O. BROENDSTED. praeconio insigni honestavit in praeclaro suo Graeciae itinerary (Reisen und Untersuchungen in Griechenland), lib. I. p. 67.

20) Conf. QUINTILIANUM XI. 2. §. 14. 15. Commemorare eum ibi auctorum de nomine pugilis et de loco ruinae magnam dissensionem, dixi annot. 11. Poteram quoque afferre, addi ab eodem scriptore, Simonidem ipsum videri loco quodam significare, Pharsali fuisse domum.

21) Cap. IV. §. 63.

πίστις τῷ Ἡλεῖῳ, παρὸς οὐδὲν οὔτος καὶ τὸ μνημονικὸν ἔμαθεν ἀφ' οὗ δὴ καὶ ἐρωτικώτερος γεγένηται, διὰ τὸ, ὅτι ἀν καλὸν ἵδη, μηδέ ποτε ἐπιλανθάνεσθαι. Ille autem in Dialogo, quem Hippiam minorem vocant²²⁾, eundem inducit Hippiae sic respondentem: καίτοι τό γε μνημονικὸν ἐπελαθόμην σου, ὡς ἔοικε, τέχνη μα, ἐν τῷ σὺ οἴει λαμπρότατος εἶναι: et altero Dialogo, qui Hippias maior appellatur²³⁾, quum Socrates difficultatis mentionem fecisset, quam habiturus esset in ediscendis Archontum inde a Solone nominibus, Hippiam ipsum spondentem, se quinquaginta nomina semel audita recitaturum; ad quae Socrates: 'Αληθῆ λέγεις· ἀλλ' ἐγὼ οὐκ ἐνερόησα, ὅτι τὸ μνημονικὸν ἔχεις: ubi, ut Xenophontis loco, τέχνη μα intelligendum esse, Hippiae minoris locus laudatus docet. Antiquissimis igitur locis, ubi artis mnemonicae fit mentio, qui eam artem profitetur, est HIPPIAS ELEUS. Quod idem praedicat de quinquaginta nominibus semel auditis, repetitum a Philostrato²⁴⁾ rem nonnihil amplificante, id recentiores artis mnemonicae instauratores sine illa ipsa, quam promittunt, arte fieri posse negant. Qui admoniti etiam in iis, ni fallor, quae Hippias dicit p. 285. D., verbis ἐκμεμαθηκέναι καὶ μεμελετηκέναι πάντα τὰ τοιαῦτα, priscum artis suae usum agnoscent.

Memorabile quoque illud, quod praeter Ammianum Marcellinum, qui Simonidis et Hippiae Elei nomina coniungit, etiam Aelianus²⁵⁾, statim post Simonidem, Hippiae nominat mnemonicam: Μέμνηται δὲ ὁν πάσχει τὰ ζῶα, καὶ δεῖται γε τέχνης τῆς εἰς τὴν μνήμην οὐ Σιμώνιδου, οὐχ Ἰππίου, οὐ Θεοδέκτου, οὐκ ἄλλου τυρὸς τῶν εἰς τόδε τὸ ἐπάγγελμα καὶ τήνδε τὴν σοφίαν κεκηρυγμένων.

Nec mirum, Sophistam unum omnium impigerrimum artium liberalium per Graeciam professorem, qui ne his quidem contentus in Olympiis pree se ferret, annulum quem haberet, pallium quo amictus, soccos quibus indutus

22) p. 368. D. Steph.

23) p. 285. E. Steph.

24) *De vit. Sophist.* I. II. p. 495. ed. OLEAR.

25) AMMIAN. MARCELL. I. c. AELIAN. *Hist. Animal.* VI. 10. ed. IACOBS.

esset, se sua manu fecisse²⁶⁾, eundem olim memoriae artem, quae ad usum quodam modo, magis vero ad ostentationem comparata videatur, esse pollicitum: quandoquidem seniori etiam tempore eos, qui omnium rerum doctrinam iactarent, ut RAYMUNDUM LULLUM eiusque commentatores et successores, memoriae artem quandam in primis venditasse scimus.

III. DE THEODECTE.

Quam Hippias Sophista excogitasse videtur, origine ad Simonidem Poëtam relata, artem *oratorio* potissimum *usui* haud scio an primus applicerit THEODECTES, Aristandri filius, Phaselites, rhetor, Aristotelis aequalis, quem Suidas Platonis, Isocratis et Aristotelis discipulum vocat²⁷⁾. Eius quidem nomen artis mnemonicae peritiā clarum cum Hippiae nomine copulat laudato Aelianus loco. In paeclarae memoriae exemplis nominatur a Cicerone²⁸⁾; Quintilianus autem²⁹⁾ dici narrat, eum semel auditos quam libet multos versus protinus reddidisse. Meminit etiam Pollux³⁰⁾ THEODECTIS Sophistae, quem memoriā polluisse refert. Qui an a nostro diversus fuerit, L. Küsterus ad Suid. l. l. nec affirmare nec negare audet. Quid? si eundem, et propterea maxime Sophistam appellatum putemus, quod mnemonicā artem a Sophista acceptam ipse profiteretur?

IV. DE CHARMADA ET METRODORO SCEPSIO.

Ali quanto post hac arte illustres inveniuntur CHARMADAS et METRODORUS SCEPSIUS, quorum hic illius fuit auditor, teste Cicerone³¹⁾.

CHARMIDAS vel CHARMADAS³²⁾ discipulus fuit Carneadis³³⁾, quocum sae-

26) PLAT. *Hipp. min.* Steph. T. I. p. 368. CIC. *de Or.* III. 32. QUINTILIAN. XII. 11. §. 21. APPULEIUS *Florid.* Ed. BOSSCHA. Opp. Appuleii T. II. p. 32—36.

27) Vid. de eo QUINTILIAN. II. 15. §. 10. III. 1. §. 15. aliisq. locis; SUID. v. Θεοδέκτης; VAL. MAX. VIII. 14, 3.

28) TUSC. I. 24.

29) XI. 2. §. 51.

30) *Onomast.* VI. 19. segm. 108.

31) *De Or.* I. 11. cf. II. 88. 90. ERNESTIUS in *Clave Metrodorum* vocat auditorem CARNEADIS, laudans CIC. *de Or.* I. 11. At hoc ipso loco cum Pearceo edidit Charmadas.

32) Vid. de eo IONS. *de Scriptt. Hist. Philos.* lib. II. c. 14. VALES. *Emenda.* p. 33.

33) CIC. *Acad.* IV. 6.

pe in libris commutatum nomen, scholamque Academicam post eum una cum Clitomacho continuavit. De eo et METRODORO SCEPSIO, ut horum exemplis obrectatores artis mnemonicae refellat, Antonium Cicero de Or. II. 88. loquentem facit: *Vidi ego summos homines et divina prope memoria, Athenis Charmadam, in Asia, quem vivere hodie aiunt, Scepsium Metrodorum: quorum uterque tamquam litteris in cera, sic se aiebat imaginibus in iis locis, quos haberet, quae meminisse vellet, perscribere.* Summa utriusque memoria celebratur etiam Ciceroni Tusc. I. 24. et Plin. H. N. VII. 24. Quintilianus quidem ³⁴⁾: *Et Charmadas, inquit, et Scepsius Metrodorus, quos Cicero dicit usos hac exercitatione (arte mnem.), sibi habeant sua: nos simpliciora tradamus.* De METRODORO SCEPSIO tamen dicit alio loco ³⁵⁾, a Cicerone tradi, illum quae cogitasset, ad verbum in agendo retulisse.

De eodem plura vide apud Harduinum in Indice Auctorum praefixo editioni Plinii Tom. I. p. 62, de hominis aetate autem p. 425, ubi merito notatur SOLINUS, qui trecentis ferme annis hunc Metrodorum facit antiquorem, quem Diogenis Cynici temporibus ait vixisse ³⁶⁾. Ceterum Solini locus memoratus dignus. *Memoriam, inquit, et arte fieri palam factum est, sicut Metrodorus philosophus... in tantum se meditatione assidua provexit, ut a multis simul dicta non modo sensuum, sed etiam verborum ordinibus detineret.* Luculentius etiam, quam a magistro, auctam esse mnemonicam artem a Metrodoro, colligere possis ex Plinio, qui capite de rerum inventoribus l. l. *Ars mnemonicus, inquit, inventa a Simonide melico, consummata Metrodoro Scepsio, ut nihil non iisdem verbis redderetur auditum.* Negaverim tamen, augendo illum rem perfecisse. Praelusit potius recentiorum temporum ostentatoribus. Nam sapienter Quintilianus ³⁷⁾ miratur, quomodo Metrodorus in XII. signis, per quae Sol meat, trecentos et sexagenos invenerit locos. *Vanitas nimirum fuit, inquit, atque iactatio circa memoriam suam potius arte, quam natura, glorianc.*

34) XI. 2. §. 26.

35) X. 6. §. 4. Conf. Cic. de Or. II. 89.

36) Polyhist. Cap. I. p. 10. ed. SALMAS. cur. PITISC.

37) XI. 2. §. 22.

V. DE ROMANIS. SUBIICIUNTUR NONNULLA DE FONTIBUS ARTIS MNEMONICAE EXPLICANDAE.

Horum duorum potissimum disciplinâ per nobiles Romanorum iuvenes, qui Graeciam Asiamque visissent vel studiorum doctrinae vel administratio-
nis provincialis caussâ, fortasse etiam per quosdam Graeculos rhetoricam ar-
tem in Italia professos, ars mnemonica Romam pervenisse videtur, libris
quoque Graecorum propagata. Nam plures Graecorum fuisse ea de re scri-
ptores, patet ex Auctore Rheticorum ad Herennium. *Scio, inquit*³⁸⁾,
*plerosque Graecos qui de memoria scripserunt, fecisse, ut multorum verbo-
rum imagines conscriberent.* At temporis invidiâ, si qui fuerunt singulares
Graecorum de memoriae arte libri, nobis subtracti sunt. Ne nomina quidem
auctorum supersunt. Diogenes quidem Laërtius³⁹⁾ inter scripta ARISTOTELIS
commemorat Μνημονικῶν ἀ. At recte Casaubonus in versione vitae Aristote-
lis per Diogenem concinnatae, quam praefixit editioni Operum Philosophi,
vertit: *De memoria aut memoriae arte I.* Quis enim certo dicat, an liber
fuerit de arte mnemonicâ? Plures meminit Diogenes Laërtius Philosophorum
de memoria libellos; sed argumenta perinde ignoramus. Romae autem mox
artem mnemonicam Rhetorum atque Oratorum plausu exceptam videmus.
Primus Romanorum qui exstant scriptorum eam commendavit incertus
AUCTOR RHETORICORUM ad HERENNIVM⁴⁰⁾, quandoquidem is ante Ciceronem
circa a. u. 666. scripsit libros rhetoricos⁴¹⁾; eamque ita copiose persecutus
est, ut nemo Veterum, qui supersunt, magis. Qui etsi in opere suo hoc
potissimum egisse videatur, ut Graecorum scriptorum praecepta Latino ser-
mone explicata corpusculo quodam complecteretur; tamen, ubi artem mne-
monicam exponit, loco quodam plerisque Graecorum qui de memoria scri-
psissent, licet in re non primaria, contradixit⁴²⁾: *ut non aliorum tantum sen-*

38) III. 23.

39) V. 26.

40) III. 16—24.

41) Vid. SCHÜTZII *Prolegg. in Libb. R̄hetor. ad Herenn. et Cic. R̄hetor.*

42) III. 23. Idem c. 16: *placet nobis, inquit, esse artificium memoriae: quare pla-
ceat, alias ostendemus.* Haud scio an alio libro deperdito uberior et studiosius com-
mendaverit artificiosam memoriam.

tentias, sed suam quoque explicuisse censendus sit. Hic igitur, sive is M. ANTONIUS GNIPHO fuit, ut Schützio placet, sive CORNIFICIUS, ut pluribus videtur, sive alias quis, inter eos, qui artem mnemonicam tractaverint eamque quodam modo perfecerint, haud est praetereundus. CICERO quidem, ne, ut ipse ait, *in re nota et pervulgata multus et insolens esset*⁴³⁾, memoriae illam disciplinam libavit duntaxat⁴⁴⁾. QUINTILIANUS autem, ubi utilissime praecipit de memoria⁴⁵⁾, simpliciora se traditurum professus, artis mnemonicæ rationem ex Cicerone aliisque breviter quidem describit⁴⁶⁾; at ita, ut ea attingat, quibus alii soleant uti, ipse non utatur propterea, quia experimentis edoctus sit, rationem suam et expeditiorem et potentiores esse⁴⁷⁾. Pauca assumit ex illa arte⁴⁸⁾: verum sic, ut simplicior eius ratio, fructuosissima illa, ab isto, quod fertur, artificio plane sit seiungenda. Nec CICERO⁴⁹⁾ igitur, nec QUINTILIANUS possunt artis illius, Romae istis temporibus

43) Ibid. 87. Quem locum si iis locis accedere dicam, quibus rhetoricos ad Herennium libros ante Ciceronis rhetorica scriptos esse nuper est demonstratum, haud mihi eo videor abuti. Nam aut scriptorem Romanum, per quem res ante Ciceronem nota fuit ac peryulgata, prorsus ignoramus; aut est is, quisquis fuit, Auctor Rhetoricorum ad Herennium.

44) *De orat. II.* 86—88.

45) XI. 2.

46) I. c. §. 11—26.

47) I. c. §. 33.

48) I. c. §. 29—31.

49) Graecum Ciceronis de memoria artificiali extare libellum in quadam Italiae bibliotheca teste GESNERO *Bibliothecae* sua Tom. II., refert G. I. VOSSIUS *de Rhet. nat. et constit.* p. 130, sed non dubitat, quin alio quam Cicerone auctore scriptus sit. Ceterum commemorat etiam MORHOF. *Polyhist.* Tom. I. lib. II. c. 6, §. 7., meminisse, sed aliorum fide, IACOBUM LECTIUM, ICTUM, extare apud Florentinos Ciceronis opus *de memoria artificiali*: Lectio ipsi id fabulosum videri. Scilicet eiusmodi commentis, qui artem mnemonicam Saec. XVI. et ineunte Saec. XVII. tantopere commendabant, rei auctoritatem augere gestiebant. Sic F. HIERONYM. MARAFIOTUS *prooem. in librum de arte reminiscientiae* (vid. Gazophylacium Art. mem. supra laud.): „*Simonidem, inquit, ferunt primo de Arte Reminiscientiae opusculum compilasse, eiusque doctrinam aliis communicasse; post quem Diagoram, Aristoxenum, Aristotelem, Ciceronem aliquosque ad haec usque tempora plurimos cernimus circa huiusmodi artem suos exposuisse libellos.*“ Quae de Veteribus hoc loco dicit, unde hauserit homo, noli quaerere. Locum autem *Auctoris Rheticorum ad Herennium* III. 16—24., Graece versum a MAXIMO PLANUDE, ex Codice bibliothecae Augustanae descriptum edidit CHR. FRIDERICUS MATTHAEI, litt. Gr. olim Professor in Univ. litt. Mosquensi. Praemisit vero hanc Graecam interpretationem 12 pagellis formae quaternariae Indici

atque etiam Horatii et Senecae Rhetoris⁵⁰⁾ aetate satis usitatae, perfectori-
bus adnumerari.

lectionum academicarum Mosquensis a. 1810. Quam editionem quum non viderit cl. FRIP.
IACOBIUS, ut ipse narrat, (in SEEBOHDI sylloge: *Archiv für Philol. und Pädag.* I. Jahrg.
1824. p. 116.), eam a. 1810. editoris dono in manus meas pervenisse testor, in plerisque con-
sentientem cum illa, quam serius curavit ANGELUS MAIUS e Codice bibliothecae Ambrosianae
in *Ciceronis sex Orationum partibus ineditis*, edit. altera Mediolan. 1817. p. 210—218.
Maximi Planudis quidem esse interpretationem, Maius hand dicit, cuius conf. monitum p.
209. Utraque vero, et Matthaei et Maii recensio longe praestat isti, quam dederat FRANCISC.
XAVER. BERGERUS in ARETINI sylloge: *Beiträge zur Litt.* 1806 Octobr. et in *Catalogo
Codicum MSS. Graecor. Bibl. Reg. Bavar.* Tom. III. p. 411. seq., cuius errores frequen-
tissime commissos, partim ex ingenio, partim ex Codicis Augustani eiusdemque post Monacen-
sis collatione a se instituta, eaque comparata cum Maii editione, correxit IACOBIUS a. 1823.
Praestantissimi viri observationes criticas habes in laudata *Seebodii* sylloge I. c. p. 113—119.
Ceterum non male ita sere indicavit MATTHAEIUS, interpretationem Graecam verbosiorum qui-
dem et liberiorem esse in nonnullis, ad summam vero probabilem.

50) *Cuique venit HORATIANI Dialogi in mentem*, Serm. II. 4:

*Unde et quo Catius? CAT. Non est mihi tempus aventi
Ponere signa novis praeceptis, qualia vincant
Pythagoran, Anytique reum, doctumque Platona.
HORAT. Peccatum fateor, cum te sic tempore laevo
Interpellarim: sed des veniam bonus, oro.
Quod si interciderit tibi nunc aliquid, repetes mox,
Sive est naturae hoc, sive artis, mirus utroque.
CAT. Quin id erat curae, quo pacto cuncta tenerem etc.*

SENECA Pater de memoria artificiali se scripturum significare videtur. Quod an fecerit un-
quam, hodie nescimus. Sed locum memorabilem adscribam (Opp. Senecae T. III. ed. Elzev.
1672. p. 72, 73.) de PORCIO LATRONE suo loquentis: „*Memoria et natura quidem felix,
sed plurimum adiuta arte etc.* In illa (i. illo) non tantum naturalis memoria feli-
citas erat, sed ars summa, et ad apprehendenda, quae tenere debebat, et ad custo-
dienda: adeo ut omnes declamationes suas, quascunque dixerat, teneret. Iam ita-
que supervacuos sibi fecerat codices. Aiebat se scribere in animo. Cogitata dice-
bat ita, ut in nullo unquam verbo eum memoria deceperit. Historiarum omnium
summa notitia: iubebat aliquem nominari ducem, et statim eius acta cursu redde-
bat. Adeo quaecunque in animum eius semel descenderant, in promptu erant.
*Video vos, iuvenes mei, plus iusto ad hanc eius virtutem obstupe-
scere. Alia vos in illo mirari volo. Hoc quod tam vobis mirum vide-
tur, non operosa potest tradi arte. Intra exiguum paucissimorum
dierum tempus poterit quilibet facere id, quod Cineas fecit: qui mis-
sus a Pyrrho legatus ad Romanos, postero die, novus homo, et senatum, et omnem
urbanam circumfusam senatui plebem, nominibus suis persalutavit. Aut quod ille
fecit, qui recitatum a poëta carmen novum, suum esse dixit, et protinus memoria*

Quum vero ex his tribus primariis artis rhetoricae apud Romanos aucto-ribus SCRIPTORI LIBRORUM AD HERENNIUM ac CICERONI de memoria agen-dum esset, quam rhetoricae quartam partem statuissent⁵¹⁾; QUINTILIANO autem, quum in elocutionis partem memoriam ac pronunciationem venire voluisset⁵²⁾: iam, missis Recentiorum additamentis atque interpolationibus, exponam ex illorum scriptorum locis, qui sunt de memoria⁵³⁾, excussis at-que inter se comparatis veteris illius artis rationem. Nam in Graecorum Rhetorum libris, ARISTOTELE, DIONYSIO HAL., HERMOGENE, ARISTIDE, THEONE ALEX., aliis, frustra, ni fallor, quaeres⁵⁴⁾.

recitavit: cum hoc ille, cuius carmen erat, facere non posset. Aut quod fecit HORTENSIUS, qui a Sisenna provocatus, in auctione persedit diem totum, et omnes res et pretia et emptores ordine suo argentariis recognoscentibus, ita ut in nullo falleretur, recensuit. Cupitis statim discere? Suspendam cupiditatem vestram, et faciam alteri beneficio locum.“

51) AUCT. RHET. AD HERENN. I. 2. CIC. de Inv. I. 7. conf. Orat. Partit. 7. extr.

52) Prooem. Inst. Or. §. 22.

53) AUCT. RHET. AD HERENN. III. 16—24. CIC. de Or. I. 34. §. 157. II. 86—88. QUINTILIAN. Inst. Or. XI. 2. Quae habent CURIUS vel CHIRIUS FORTUNATIANUS Lib. III. (Rhett. Lat. ed. CAPPERONNER. p. 96, 97.) et MARCIANUS CAPELLA (ib. p. 430, 431, vel in GROTHI edit. p. 176, 177.), ea ex illis, quos nominavi, sunt excerpta. Brevior etiam de me-moria ALCUINUS in Dialogo de Arte Rhet. (ed. CAPPERON. p. 405.), artis mnemonicae, si quid video, expers. Nempe interrogat CAROLUS REX: „Quid dicis de nobilissima, ut re-or, Rhetoricae parte, memoria?“ Respondet ALCUINUS: „Quid aliud, quam quod M. Tullius dicit, quod thesaurus est omnium rerum memoria, quae nisi custos cogita-tis inventisque rebus et verbis adhiberetur, intelligimus, omnia etiamsi praeclar-a fuerint in oratore, esse peritura?“ CAR. „Suntne aliqua eius praecepta, quo-modio vel illa obtinenda vel augenda sit?“ ALC. „Non habemus eius alia prae-cepta, nisi dicendi exercitationem, et scribendi usum, et cogitandi studium, et ebrietatem cavendam, quae omnibus bonis studiis nocet maxime, quae non solum corporis aufert sanitatem, sed etiam mentis adimit integratatem.“ CAR. „Sufficiunt haec praecepta, si quis idoneus est ad haec implenda“ etc.

54) Ab his Rhetoribus Graecis diligentius perlustrandis me avocavit olim G. I. Vossius de nat. et constit. Rhet. p. 129. assentiens ARISTOTELI aliisque Veterum, quos memoriam praeterisse in oratoria facultate, testis esset Laërtius in Zenone. Quam etiam neglexisset HERMOGENES, item APHTHONII INTERPRES initio Prolegg. opera oratoris enumerans. His potius se accedere, quam Ciceroni, qui eam disserit Rhetoricae partem statuisse. Quamvis vero fretus auctoritate Viri in Rhetorum scriptis versatissimi tunc quaerere in laudatis libris desiissem, idem hac sententia permansi, plures etiam Graecorum Rhetorum memoriam quar-tam Rhetoricae partem statuisse, ideoque in libris suis nunc deperditis uberioris de memoria

egisse; memor eorum, quae legisset apud CICERONEM *Rheticorum sive de Inv.* I. 7.: „*Materia quidem nobis rhetoricae videtur ea, quam Aristoteli visam esse diximus, partes autem hae, quas plerique dixerunt, inventio, dispositio, elocutio, memoria, pronunciatio.*“ Ceterum nec APSINIS *Artem Rhet.*, quem I. C. T. ERNESTIUS *Lexico Technologiae Graecorum Rhetoricae* p. 220. de memoria copiosius atque accurius exposuisse dicit, nec GEORGI TRAPEZ., hominis saeculi XV., lib. IV. *Rhet.*, quem idem *Lexico Technol. Latinorum Rhet.* p. 203. doctrinae mnemonicae quendam commentarium scripsisse narrat, inspicere potui, aegre carens rarissima illa *Rhetorum Graecorum* editione Aldina. Huius quidem desiderium post levavit nova *Rhetorum Graecorum* sylloge a CHRISTIANO WALZIO curari copta, cuius nuper Vol. I. a. 1832, Vol. IV., Vol. V. et Vol. VII. P. I. a. 1833 edita, in manus nostras pervenere.

PARS II.

DE ARTIS MNEMONICAE NATURA ET CONSTITUTIONE.

C A P. I.

DE ARTIS MNEMONICAE FINE.

Ars mnemonica⁵⁵⁾ est ars excolendae et perficiendae memoriae, Cu-
ius quum duo potissimum genera sint, alterum patientis, alterum efficientis:
patiens memoria, quae rerum perceptarum servata simulacra contineatur;
efficiens, quae eadem *reminiscentia* dicitur⁵⁶⁾, quae simul percipiat, se ali-
quando eas res cognovisse, quarum imagines contemplatur⁵⁷⁾: arte mnemo-
nica consequi debemus, tum ut cito imprimantur menti percepta, atque se-
mel impressa diu retineantur; tum ut prompte recordemur eorum, quae olim
impressimus.

Utrumque atque ad quemcunque usum praestare voluisse videntur, qui
artem memoriae primum protulerunt: ita ut aliquis THEMISTOCLI illam polli-
citus, quum ab eo interrogaretur, quidnam ars illa efficere posset, respon-

55) *Artem mnemonicā* dico cum PLINIO maiore, quum μνημονικὴ sit, quod ad me-
moriā pertinet. Sed CICERONEM, AUCTOREM RHETORICOR. AD HERENN. et QUINTILIANUM
non memini ita dicere, sed μνημονικά, artem memoriae; etiam memoriae disciplinam (Cic.
de Fin. V. 1.). Μνημονευτική vocari GERH. IO. VOSSIUS ait in Commentarior. rhetor. lib.
I. c. 1. p. 6. et lib. VI. c. 9. p. 518. At huiusmodi appellationis et usus exempla apud Veteres de-
sidero, licet οἱ φύσει μνημονευτικοὶ sit in Planudea interpretatione, ed. MATTHÆI, p. 4, quam
laudavi annotat. 49.

56) Subtiliter discernit a memoria (μνήμη) reminiscentiam (ἀναμνήσις). ARISTOTELES de
Memoria et Reminiscentia (Opp. ed. BEKKER.) T. II. p. 449—453, suoque acumine, quare,
quum illius compluria animalia participant, haec nulli animali praeterquam homini concessa
sit, cap. 2. extr. exponit.

57) Conf. Initia Philos. Pars I. c. 1. §. 21. in IO. AUG. ERNESTI Init. doctrinae solid.

deret; *ut omnia meminisset*⁵⁸⁾. Postea autem, quum memoria vim suam in lumen orandi extulisset, iique qui artem mnemonicā excoolerent, ad oratoris maxime usum⁵⁹⁾ eam accommodassent: utrumque quidem, et diu tenere memoriam, et facile, quae tenerentur, quandocunque placeret, revocare, per eam assequi studuerunt: plurimum tamen reminiscientiam, quandoquidem huius potissimum oratori est usus, eā iuvare conati sunt.

Quum autem in Graecorum et Romanorum civitatibus omnes fere res civiles orationibus memoriter habendis agerentur, quae saepe longissime protenderentur, non fieri non poterat quin pergratum se offerret oratoribus praesidium, quo instructi orationis habendae partes harumque capita meditatione ita complecterentur, ut excidere non possent, quoque adiuti etiam singularem sententiarum deinceps reminiscerentur.

Tale autem esse videbatur ars, cuius inventio ad SIMONIDEM referretur, consummatio aliis adscriberetur, quae quibus consisteret, iam exponendum.

C A P. II.

DE LOCIS ET IMAGINIBUS GENERATIM.

Pancis verbis CICERO summam rei comprehendit dicens: *iis qui hanc partem ingenii exercerent, locos esse capiendos, et ea quae memoriam tenere vellent, effingenda animo, atque in his locis collocanda.* Sic fore, ut ordinem rerum locorum ordo conservaret: *res autem ipsas rerum effigies notaret*⁶⁰⁾. Omne igitur illud memoriae artificium continebatur disponendis notandisque rebus⁶¹⁾; idque fiebat *locis et imaginibus*⁶²⁾. Nam qui artis mnemonicæ operationem ediscere vellent, primum *locos* eligebant *quam maxime spatiuosos*,

58) CIC. de Orat. II. 74. de Fin. II. 32.

59) *Maxime*, inquam, ad oratoris usum; non ad oratoris solius. Etenim vix dubito, quin ad alias etiam res memoriae affigendas Veteres usi sint arte: tum ob rei ipsius rationem; tum ob nonnullas Veterum significationes, ut RHETORIS HERENNIANI III. c. 17. in.: *Qui μνημονικὰ didicerunt, possunt, quae audierunt, in locis collocare et ex his memoriaiter pronunciare.*

60) CIC. de Or. II. 86. extr.

61) Conf. I. c. 87. §. 357.

62) RHET. AD HERENN. III. 16. §. 29.

*multa varietate signatos, domum forte magnam et in multos diductam recessus, ut QUINTILIANUS⁶³⁾ tradit; aut fortasse plura unius fori aut plateae aedificia⁶⁴⁾. Hos locos identidem mente percurrendo efficiebant, ut ex ordine eos animo tenerent, ita ut primi loci cogitatio excitaret memoriam secundi, et sic in reliquis deinceps. At hos locos tam alte animo infigere debebant, ut in eorum recordatione non laborarent; ut potius loci, quo ordine comparati et dispositi essent, eodem sponte occurrerent⁶⁵⁾. Causam affert QUINTILIANUS hanc: *plus quam firmam esse debere memoriam, quae aliam memoriam adiuvet.**

Deinde orator orationis, quam vel scripsit vel cogitatione tantum complexus est, singulas partes praecipuas vel propositiones primarias mente connectit cum singulis locis illis, et quidem ordine quodam memoriam adiuvante, ut primam propositionem vestibulo quasi assignet, secundam atrio, et sic porro⁶⁶⁾. Nexus hunc singularum propositionum cum singulis locis identidem mente repetit, donec eo pervenerit, ut cogitatio uniuscuiusque loci simul excitet propositionis cum eo connexae cogitationem. Itaque animus et primiarum orationis sententiarum facilius reminiscitur locorum admonitione; et earum consecutionem prompta locorum consecutione celerius revocat in mentem.

Haec de locis generatim. Iam de altera parte, *imaginibus*. Atque his quidem animo conceptis orator res singulas de quibus dicturus est, singulasque sententias notat atque exprimit, easque imagines in locis ante comparatis collocat, ita ut cuiusque rei vel sententiae imago in eo disponatur loco, quocum cogitatione connexum est caput id orationis, ad quod probandum aliiquid commemoratur. Fit autem imaginibus, ut quae cogitatione tantum essent percepta, iam a sensu tradita atque impressa videantur.

63) QUINTILIAN. XI. 2. §. 18. Is quidem *loca* dicit; at CICERO et in artis memoriae ad umbratione et in *Topicis* suis *locos*, RHETOR AD HERENNIO in mnemonicis item *locos*.

64) Conf. QUINTILIAN. I. c. §. 21. init.

65) QUINTILIAN. I. c. §. 18. *Primus hic labor est, non haerere in occursu.* Vid. SPALDING. ad h. I. Conf. RHET. AD HERENN. III. 18. §. 31. *Locos, quos sumpserimus, egregie commeditari oportebit, ut perpetuo nobis haerere possint.* Nam *imagines*, sicut litterae, delentur, ubi nihil illis utimur: *loci, tanquam cera, remanere debent.*

66) Conf. QUINTILIAN. I. c. §. 20.

Imagines vero, id est, formae quaedam et notae et simulacra eius rei, quam meminisse volumus⁶⁷⁾, ita comparantur:

Orator postquam sententiam, cuius vult recordari, aut meditatione tantum, aut et scriptione memoriae commendavit, eam imagine comprehendit: quae, quum rerum similes imagines esse oporteat⁶⁸⁾, rei cuius vult meminisse similitudinem quandam exprimere debet. Quod fit dupli- ci ratione: altera quae minus, altera quae magis perfecta. Nam imago quae effingitur ab oratore et in loco collocatur, esse potest *nota* quaedam vel *signum* quo admoneatur tantum rei cuius vult meminisse, ex re tota desumptum; ut, si de homine quodam inter alia de eius navigatione dicendum est, signum quo admoneatur sit ancora; si de eius militia, aliquid ex ar- mis⁶⁹⁾: cuius signi in loco quodam positi admonitione in totius rei memori- am reponetur. Imago autem, quae collocatur in loco quodam, etiam per- fectione esse potest, ita ut ea non solum admoneamus rei, sed ut eius vi etiam repraesentetur et in aspectus iudicium vocetur res ipsa, cuius memoria opus est. Luculentum talis imaginis exemplum habemus apud RHETOREM HE- RENNIANUM III. 20. §. 33., cuius haec sunt verba: *Si accusator dixerit, ab reo ho- minem veneno necatum, et hereditatis causa factum arguerit, et eius rei multos dixerit testes et consciens esse; si hoc primum, ut ad defendendum no- bis expeditum sit, meminisse volemus; in primo loco rei totius imaginem con- formabimus; aegrotum in lecto cubantem faciemus ipsum illum, de quo age- tur, si formam eius detinebimus; si eum non agnoverimus, aliquem aegro- tum non de minimo loco sumemus, ut cito in mentem venire possit, et reum ad lectum eius adstituemus, dextra poculum, sinistra tabulas, medico (sc. digito) testiculos arietinos (i. e. crumenam e pelliculis testiculor. ariet.) tenentem. Hoc modo et testium, et hereditatis, et veneno necati memoriam habere poterimus.*

Quomodo in ceteris imaginibus agendum sit, statim addit. Item, inquit, deinceps cetera crimina ex ordine in locis ponemus, et quotiescunque rem me- minisse volemus, si formarum dispositione et imaginum diligentie notatione utemur, facile ea quae volemus, memoriam consequemur.

67) RHET. AD HERENN. III. 16. §. 29. Conf. QUINTILIAN. I. c. §. 21.

68) RHET. AD HERENN. I. c. 20. §. 33.

69) Conf. QUINTILIAN. I. c. §. 19.

Diximus de locorum et imaginum comparatione. Nunc, quomodo orator his duobus ita comparatis utatur, dicendum.

Orationis ediscendae memoriam repetiturus incipit ab initio locos suos recensere, quod cuique credidit, reposcens⁷⁰⁾: tum propositionem primariam cum eo cogitatione connexam, tum imagines rerum in eo collocatas⁷¹⁾. Quodsi hac exercitatione satis saepe usus est, ita ut locorum ordo tam firmiter animo inhaereat, ut primi cuiusque cogitatio statim ceterorum locorum cogitationem excitet deinceps; connexio autem singularum propositionum cum singulis, quibus quaeque assignata est, locis tam arte copulatur, ut hi sine illis in mentem recurrere non possint; ut porro loci cuiusque representatione simul referat imagines singularium rerum in eo collocatas: tum fiet, ut orator hac exercitatione rerum disponendarum notandarumque, ex mnemonicis praceptis facta, in pronuncianda oratione adiuvetur⁷²⁾. Utuntur vero apta quadam similitudine, qua usi sunt CHARMADAS et Scepsius METRODORUS⁷³⁾, et quam haud scio an SIMONIDES ipse iam adhibuerit⁷⁴⁾: *Quemadmodum qui litteras sciunt, possunt id quod dictatum est, scribere, et recitare quod scripserunt: ita qui μνημονικὰ didicerunt, possunt quae audierunt, in locis collocare, et ex his memoriter pronunciare. Loci enim cerae aut chartae simillimi sunt; imagines litteris; dispositio et collocatio imaginum, scripturae; pronunciatio, lectioni*⁷⁵⁾.

His quae commemoravimus de locorum et imaginum comparatione atque usu, artis mnemonicae oratori accommodatae rationem modumque proprie contineri constat. Quae, ut uno obtutu possent comprehendendi, disiunximus a quibusdam specialibus praceptis, quae a rhetoribus Latinis, Herenniano imprimis, traduntur. De his iam paucis agendum.

70) Conf. QUINTILIAN. I. c. §. 20.

71) De imaginibus conf. praecipientem RHETOREM HERENNIANUM III. c. 22. §. 37.

72) Conf. CIC. de Or. II. 87. §. 357.

73) CIC. I. c. 88. §. 360.

74) Conf. CIC. I. c. 86. §. 354. extr.

75) Verba subministravit AUCTOR RHETORICOR. AD HERENN. III. c. 17. init. Conf. CIC. de Partit. Orat. 7. §. 26. QUINTILIAN. I. c. §. 21.

C A P. III.

DE LOCIS SINGULATIM.

Loci, quibus utebantur, erant *aut natura aut manu absoluti*⁷⁶⁾. Naturalium nullum attuli exemplum, quandoquidem haud certo affirmare possum, an loca naturalia quibus Recentiores uterentur, ut regionis alicuius partes eminentes, cuiusmodi sunt montes, flumina, silvae; arborum certus numerus; membra corporis humani vel brutorum corpora⁷⁷⁾, an haec igitur adhibuerint Veteres. *Artificiosi* autem loci sunt *aedes, intercolumnium, angulus, fornix, et alia quae his similia sunt*, ut ait *SCRIPTOR HERENNIANUS*⁷⁸⁾. Haec eiusmodi sunt, ut in iis imagines collocari possint multae aut paucae pro loci cuiusque amplitudine. Et *in operibus publicis, et in urbium ambitu*⁷⁹⁾, et *in picturis*, capi posse loca, monet *QUINTILIANUS*. Paullo autem ante dixerat, eos qui arte mnemonica uterentur, *loca discere quam maxime spatiosa, multa varietate signata, domum forte magnam et in multis diductam recessus*.

Praeter locos, qui iam parati aut natura aut manu facti reperirentur, poterat quis etiam ipse fingere sibi. Ita enim **AUCTOR RHETORICOR. HERENNIAN. I. c. §. 32.**: *Quamquam facile est ei, qui paullo plura exploraverit, quamvis multos et idoneos locos comparare: tamen si quis ad ista satis idoneos invenire se non putabit, ipse sibi constituat quam volet multos licebit. Cogitatio enim quamvis regionem potest amplecti, et in ea situm loci cuiusdam ad suum commodum et arbitrium fabricari et architectari. Quare licebit, si hac prompta copia contenti non erimus, nobismet ipsos nobis cogitatione nostra regionem constituere, et idoneorum locorum commodissimam distinctionem comparare. Atque his consentit quod QUINTILIANUS⁸⁰⁾ Opus est, inquit, locis, quae vel singuntur vel sumuntur.*

76) RHEATOR AD HERENN. I. c. §. 29.

77) Vid. LAMB. SCHENCKELIUS de *Memoria* lib. II. p. 111 seq., et IO. AUSTRIACUS de *Mem. artificiosa Tractat. I.*

78) RHEOTOR AD HERENN. I. c.

79) QUINTILIAN. I. c. §. 21. Intelligit, puto, templa, turre, arces, rel. huiusmodi.

80) I. c. §. 21.

Loci igitur erant vel *naturales*, vel *artificiosi*; vel *sumpti* vel *ficti*. Iam diligenter praecipitur a triumviris nostris, a RHETORE HERENNIANO imprimis, de locorum *multitudine*⁸¹⁾, *ordine*⁸²⁾, *notatione*⁸³⁾, *dissimilitudine*⁸⁴⁾, *magnitudine*⁸⁵⁾, *luce*⁸⁶⁾, *intervallis*⁸⁷⁾: quae apud ipsos scriptores legi malim. Facilius etiam ea intelligerentur certiusque explicarentur, si singula quaeque exemplis illustrassent auctores.

Iis quidem, quae de locorum dissimilitudine et intervallis praescribit RHETOR HERENNIANUS, declaratur, quid CICERO de *Orat.* II. 87. §. 358. sibi velit, *locos explicatos* requirens; ex iis autem, quae ille l. c. 19. §. 32. dicit, patet, quomodo capienda sint huius verba: *Locis est utendum — illustribus.* Porro ad verba capit. 19. §. 19.: *Dissimiles forma atque natura loci comparandi sunt, ut distincte interlucere possint. Nam si quis multa intercolumnia sumpserit, conturbabitur similitudine locorum rel., ad ista igitur verba monemus: hinc diversa aedicia in eadem regione sita, si eadem in multos diducta sint recessus, quorum cuique pars orationis committatur, locos in primis utiles videri.* Praeterea ad §. 31. *Ne forte in numero locorum falli possimus, quintum quemque locum placet notari: quod genus, si in quinto loco manum auream collocemus; et in decimo aliquem notum, cui praenomen sit Decimo; deinde facile erit similes notas quinto quoque loco collocare.* Hoc tum potissimum valebit, ubi in oratione maior quidam rerum, quae ad idem argumentum pertineant, numerus certa quadam successione erit enarrandus.

Ceterum ex artis mnemonicae praceptis necessarium fuisse puto, ut complexus locorum, quo quis uti vellet, ad orationem, ut hoc utar, ediscendam, secundum ordinem quendam in partes esset divisus; idque ita, ut singulorum locorum, in quibus imagines essent collocatae, numerus uno maiori loco contineretur;

81) RHETOR AD HERENN. III. 17. §. 30. et 24. §. 40. Conf. CIC. l. c. 87. §. 358.

82) RHETOR AD HERENN. l. c. et c. 18.

83) Ibid. c. 18. extr.

84) Ibid. c. 19. §. 31.

85) Ibid. §. 31.

86) Ibid. §. 32.

87) Ibid. §. 32. Conf. CIC. l. c. §. 358.

hic maior autem locus unius maximi loci pars esset: plane ut in domo magna, quae plurium est tabulatorum, quorum unumquodque plura continet conclave. Etenim locorum complexus, sic in partes distributus, praecipue utilis fuerit oratori, cui in longa oratione memoriter pronuncianda hoc difficillimum esset, menti affigere non solum argumenta partium praecipuarum, ut exordii, narrationis, propositionis et partitionis, confirmationis et refutationis, perorationis denique: sed etiam continere partium sectiones, sectionumque capita singula. In quo iuvari oratorem locorum ex certo ordine comparatorum admonitione, usu olim ipse comperi, quum orationis cuiusdam Ciceroniana (prima erat Catilinaria) ex artis praecepsis memoria tenendae periculum fecisset.

Hanc quidem, quam commemoravi, locorum conditionem disertis plane auctorum verbis non possum demonstrare: at eandem imprimis fuisse quaesitam, ex pluribus triumvirorum nostrorum significationibus⁸⁸⁾ elucet. Ac profecto alioqui illa locorum disciplina, CICERONI tantopere probata, oratori parum fuisse fructuosa.

C A P. IV.

DE IMAGINIBUS SINGULATIM.

Imagines, ut supra vidimus⁸⁹⁾, sunt formae quaedam et notae et simulacra eius rei, quam meminisse volumus: quod genus equi, leones, aquilae;

88) Huc refero, quod CICERO de Or. I. c. §. 357. dicit, neminem fere esse tam acri memoria, ut non dispositis rebus in sententiarum ordine complectendo adiuyetur. Quando idem porro de Or. II. 86—88. passim de rerum ordine loquitur, qui locorum ordine conservetur, intelligere videtur repetitionem certa successione, ex qua unaquaque res ad argumentum, quo pertinet, refertur. Hoc QUINTILIANUS etiam I. c. §. 20. innuere videtur, de iis qui arte uterentur dicens: *quum est repetenda memoria, incipiunt ab initio loca haec recensere, et, quod cuique crediderunt, reposcunt, ut eorum imagine admonentur: ita quamlibet multa sint, quorum meminisse oporteat, fiunt singula connexa quodam choro, ne errant coniungentes prioribus sequentia solo ediscendi labore.* Ad quem locum conf. annott. GESNERI et SPALDINGII. Eodem spectat, quod paullo ante (§. 18.) dixerat de domo magna et in multos diducta recessus; et de iis (§. 20.) qui impluvia circumirent, nec cubiculis modo aut exedris, sed statuis etiam similibusque, quos reminisci vellent, sensus committerent.

89) Pag. XX. Verba sunt RHETORIS HERENNIANI III. 16. §. 29.

quorum memoriam si volemus habere, imagines eorum certis in locis collocare nos oportebit.

Pergit idem ⁹⁰⁾: Quoniam ergo rerum similes imagines esse oportet, et ex omnibus verbis notas nobis similitudines eligere nobis debemus; duplices similitudines esse debent; unae rerum, alterae verborum. Rerum similitudines exprimuntur, quum summatis ipsorum negotiorum imagines comparamus: verborum similitudines constituuntur, quum uniuscuiusque nominis et vocabuli memoria imagine notatur.

De rerum imaginibus quoniam supra paullo copiosius dictum est, et, quo pacto eae in locis constituendae sint, expositum: hoc capite de verborum imaginibus praecipue dicendum, postquam pauca de imaginum ratione, qualem CICERO et SCRIPTOR HERENNIANUS requirunt, commemorata erunt.

In orationibus forensibus quum omnia fere, quae proferuntur, ad homines pertineant, nihilque magis moveat hominem quam homo: quas, ad sententias in mentem sibi revocandas, in locis collocabant imagines, eae hominum potissimum erant. Hinc CICERO ⁹¹⁾, *Rerum memoria*, inquit, *propria est oratoris: eam singulis personis bene positis notare possumus, ut sententias imaginibus, ordinem locis comprehendamus.*

Ut de locorum ratione plura a RHETORE HERENNIANO praeciipiuntur, ita de imaginum earum, quae res repraesentant ⁹²⁾. His omnibus iubetur, ut illae sint et acriter expressae seu vividae, et ad monendum idoneae. Quae CICERO edicit ita, utendum esse *imaginibus agentibus, acribus, insignitis, quae occurrere celeriterque percutere animum possint* ⁹³⁾: his ipsis, quae a QUINTILIANO ⁹⁴⁾ quidem e Cicerone ad verbum repetuntur, lux affunditur per ea, quae RHETOR HERENNIANUS ⁹⁵⁾ uberius declarat.

Iam dicatur de *verborum memoria artificiali*: ea artis mnemonicae parte, quae, aliquanto difficilior ceteris, toti arti apud multos invidiam fecit, a

90) I. c. 20. §. 33.

91) *De Orat.* I. c. §. 359.

92) RHETOR HERENN. I. c. 22.

93) CIC. I. c. §. 358.

94) QUINTILIAN. I. c. §. 22.

95) RHET. HERENN. I. c. §. 37.

Recentioribus autem praecipuo studio exulta est, vel potius absonis commentis corrupta, miserisque argutiis deturpata.

Oratori quum saepe tenenda sint nomina minus nota ac familiaria; quum eidem frequenter aliorum sententiae ad verbum reddendae; quum denique nonnunquam tota oratio ad verbum ediscenda: opus illi videbatur ratione, qua adiutus non sententias solum, sed etiam verba memoriter posset recitare. Artis mnemonicæ praeceptrores autem quoniam vel ad res vel ad sententias memoriae mandandas adhibebant imagines, his etiam ad verba menti affigenda utebantur hunc in modum ut, postquam, quorumcunque vellent meminisse, ea identidem secum transiissent⁹⁶⁾, unumquodque, cuius memoriam habere vellent, vocabulum *notarent*. Cuius notationis genera haec potiora:

1. Si verbum, quod memoria tenere vellent, significaret rem, quae imagine facile exprimeretur, ipsa rei imagine notabant id verbum.

2. Sin autem verbum tale non esset, tum imagine similis cuiusdam verbi, quale significaret rem eiusmodi, quae imagine exprimi facile posset, verbum, quod memoriae mandare vellent, notabant.

3. Sin vero verbum indicaret notionem abstractam, quae per se imagine non posset formari, tum a genere ad partem traducebant notationem: ita ut pro notione abstracta, cuius fingi non posset imago, sumerent notionis cuiusdam, quae effungi utique posset, simulacrum.

4. Si denique verba, quae vellent memoriae tradere, eiusmodi essent quae similitudine nulla possent repraesentari: ut orationis particulæ quædam, quales grammaticæ sunt Coniunctiones: tum eorum sibi formabant notas qualescunque, quibus tum semper uterentur.

Invenitur apud RHET. AD HERENN.⁹⁷⁾ hoc exemplum rationis exprimendi imaginibus similitudines verborum. *Quum verborum similitudines, inquit, imaginibus exprimere volamus, plus negotii suscipiemus, et magis ingenium nostrum exercebimus. Id nos hoc modo facere oportet: Iam domuitiō nem reges Atridae parant. In primo loco constituere oportet manus*

96) RHET. HERENN. l. c. 21.

97) l. c. c. 21.

ad coelum tollentem Domitium, quum a Regibus Marciis loris caedatur ⁹⁸⁾. *Hoc erit, Iam domuitionem reges. In altero loco Aesopum et Cimbrum, subornantes vitta Iphigeniam (sc. constituere oportet). Hoc erit, Atridae parant. Hoc modo omnia verba erunt expressa* ⁹⁹⁾.

98) Nota *Marciorum Regum* familia; etiam illud, gentem Marciam genus suum ab Anco Marcio, quarto Romanorum rege, deducere voluisse. *Marcios Reges* vel per ERNESTI Clavem Cic. p. 203, 204. poterant nosse tirones. Ex illa igitur familia quosdam *Domitium* quendam loris cecidisse, loci nostri testimonio constat, aliunde quidem incognitum. Ceterum *Domitiorum* primos certum est plebeios fuisse, allectos subinde inter patricios, ut tradit SUETONIUS in *Nerone* c. 1.

99) Dedi hunc locum, in quo scr. et edd. mire variant, ut eius lectionem prae aliis probabilem arbitrabar, qui in cuiusquam editorum me negem esse mancipio. *In primo loco pro vulg.* *In loco* restituit SCHÜTZIUS, quem recte secutus est ORELLIUS. Prior in sequenti-bus, quae corrupta esse apparet, omnia planissima se reddidisse sperabat (Conf. eius Notas in libb. ad Herenn., in Cic. Opp. Rhet. apud Goeschenium editis Vol. I. P. II. p. 82. 83.) ita emendando, ut in Cic. Opp. editione ap. Fleischerum curata Tom. I. iterum edere ausus est: *Aesopum et Cimbrum subornare in Iphigenia agentes Agamemnonem et Menelaum.* In tragoezia Iphigenia quidem duo clarissimos tragoeodos, Aesopum et Cimbrum, egisse Agamemnonem et Menelaum, vere omnino sumi videtur ab omnibus fere interpretibus. At num *subornare* vera sit lectio, quaeri potest: intelligendum esse simplex *oportet*, tum statueretur; cui equidem praefcro explicationem meam intelligentis e praecedentibus, modo et faciliori et sensui aptius conveniente, *constituere oportet*. SCHÜTZII emendatio et lectio *in Iphigenia* mera erat ipsius coniectura, eaque minime necessarium continens additamentum in fabula argumenti in vulgus noti. *Agentes*, quod idem coniecit, latere arbitrabatur in lectione codicu-m quorundam *vagantem*, quae mihi quidem, quamvis corrupta, nonnisi e margine illata videtur. Nomina *Agamemnonem* et *Menelaum* sine dubio glossemate irrepererunt. Id constare e Cod. Turicensi, monuit ORELLIUS, idque apertum esse ego putaram, qui, antequam in Códice Turic. ista abesse cognovi, glossema agnoram ipse, mihi olim confirmatum eo, quod in codice Mediceo Gronovii nomina *Agamemnonem* et *Menelaum* omissa scirem. *Ag.* et *Men.* nil nisi interpretamenta esse, sed vetera, in ed. Rhet. ad Herenn. a se curata censuit quoque LINDEMANNUS. Quae scripsi *subornantes vitta Iphigeniam*, scripsi timide quidem, veruntamen ita, ut vulgatae lectioni *subornare Iphigeniam*, *Agamemnonem* et *Menelaum* iudicarem aliquanto *praestare*. Neque in codicibus nulla scriptio-nis nostrae vestigia. Nempe in melioribus Palatinis, quos excussit Gruterus, erat: *subornari ut ad Iphigeniam*, atque eodem modo in Gronovii codice Mediceo. *Subornantes* in codd. deformatum putabam ideo, quod vocabulum exstabat in fine scriptum compendio. *Vitta* delitescere mihi videbatur in illis *i ut ad.* Atque iam ORELLIUS acute viderat, in variantibus lectionibus aliquid de Iphigenia *vitta* ad sacrificium ornata latere, quibus expressum fuerit verbum *parant*, quod in vulgata, et in SCHÜTZII coniectura, non „*exprimitur*.“ LINDEMANNO quidem in corruptae lectionis varietate nihil aliud occultari visum, quam *subornatam agentes Iphigeniam* h. e. ad sacrificium. Equidem quam praeferam rationem, et quare, dixi: *meliora doceant oculatiiores.*

Ex hoc loco plurium notationis generum exempla duci poterunt.

Quod primum posui, eius generis exemplum erit verbum *Atridae*, significans Agamemnonem et Menelaum reges, quorum imagines habebimus, si histrionum, quos illorum personas agere vidimus, *Aesopi et Cimbri*, imagines ante oculos posuerimus.

Secundi generis exemplum dabit notatio verbi *domuitionem*. Nam quum Rhetor Herennianus hanc vocem imagine bene exprimi posse negaret, similis alicuius verbi imagine usus est. *Domitii* igitur imaginem constituit non nisi ob verbi similitudinem; *lora* autem et *flagra* per *Reges Marcios* in eodem adhibuit, ut vocabulum *reges* certius menti advocaret imagine, quae vehementius exsuscitaret memoriam, agendo quasi percutiens¹⁰⁰⁾. Huc etiam referendum illud, quod RHETOR HERENNIANUS c. 20. in causae cuiusdam publicae memoria sub *imagine simplici*, quam vocat, comprehendenda praecipit: ut reus ad aegroti lectum adstituatur, dextra poculum, sinistra tabulas, medico digito crumenam ex pelliculis *testiculorum* arietinorum tenens. Qua imagine admoneri volebat non solum heredipetae eiusdemque benefici, sed etiam *testium* facinoris, quos multos esse dixisset accusator.

Tertii generis exemplum etiam ex illa versus: *Iam domuitionem reges Atridae parant*, notatione promitur. Quum enim vagum *reges* exprimi satis commode non posse videretur, *Reges Marcios* eosque *Domitium*, quem verbi *domuitionem* similitudo advocasset, caedentes, in locum constituit. Domitius quum manus ad coelum tollens cogitetur, dum a Marciis Regibus loris caedatur, etiam particula *iam* exprimitur, quod praestari quodammodo poterat nota duarum, quae simul fierent, actionum.

Ultimum, quod commemoravi, genus meminit CICERO¹⁰¹⁾ disertis verbis. *Verborum*, ait, *memoria — maiore imaginum varietate distinguitur*. *Multa enim sunt verba, quae formari similitudine nulla possunt: eorum fingendae nobis sunt imagines, quibus semper utamur*. Talium etiam verborum imagines fuerunt, opinor, inter earum multitudinem, quae a Graecis quibusdam

100) *Cic. de Or. II. 86. §. 358. Imaginibus autem (utendum est) agentibus, acribus, insignitis, quae occurrere celeriterque percutere animum possint.*

101) *De Or. II. 88.*

conscriptae erant teste RHETORE HERENNIANO¹⁰²⁾. Scio, inquit, plerosque Graecos, qui de memoria scripserunt, fecisse, ut multorum verborum imagines conscriberent, uti, qui eas ediscere vellent, paratas haberent, ne quid in quaerendo opera consumerent. Sed improbat eorum rationem quatuor de causis, nec temere. Primum, ait, quod in verborum innumerabilium multitudine ridiculum sit, mille verborum imagines comparare. Quantulum enim poterunt haec valere, quum ex infinita verborum copia, modo aliud, modo aliud nos verbum meminisse oportet! Deinde cur volumus ab industria quemquam removere, ut ne quid ipse quaerat, quum nos illi omnia parata quaesitaque tradamus? Praeterea similitudine alia alias magis commovetur. Nam ut saepe, formam si quam similem cuiquam dixerimus esse, non omnes habemus assensores, quod alii videtur aliud: ita fit in imaginibus, ut, quae nobis diligenter notatae sint, eae parum videantur insignes aliis. Quare sibi quemque suo commodo convenit imagines comparare¹⁰³⁾. Postremo praceptoris est docere, quemadmodum quaeri quidque conveniat, et unum aliquod, aut alterum, non omnia, quae eius generis erunt, exempli causa subiucere, quo res possit esse dilucidior. Ut quum de prooemiiis quaerendis disputamus, rationem damus quaerendi, non mille prooemiorum genera conscribimus: ita arbitramur de imaginibus fieri convenire¹⁰⁴⁾.

His quae attuli, notationis generibus aliud quoddam, quod ex ἐτυμολογίᾳ dicitur, adiungerem, si de loci cuiusdam Ciceroniani¹⁰⁵⁾ sensu mihi constaret. Quam facultatem (scil. locis et imaginibus idoneis utendi) et exercitatio, inquit, dabit; ex qua consuetudo gignitur; et similium verborum conversa et immutata casibus, aut traducta ex parte ad genus notatio¹⁰⁶⁾, et

102) l. c. c. 23.

103) Haec Rhetoris Herenniani revocant in mentem, quae olim in epistola, data Berolini d. 26. Sept. 1805., mihi scripsit Vir praeclarus, Helveticus nominis decus, IOANNES MUELLERUS: „Die Fortsetzung über die artes mnemonicas erwarte ich begierig: ich glaube, jeder macht sich seine, und selten ist eine für mehrere Menschen.“

104) Vel ex his RHETORIS HERENNIANI III. 23. argumentis patere puto, quam vana fuerit multorum e Recentioribus, etiam ARETINI et KAESTNERI, in tot verborum imaginibus conscribendis importuna industria.

105) CIC. de Or. II. 87. §. 358.

106) ERNESTIUS sensum esse ait: per etymologiam, quae sit notatio, vel nominis ipsius, vel coniugati alienius, a quo facilius reperiatur imago, rel. Sed non video, quem sensum, si haec explicatio assumatur, verba habeant: conversa et immutata casibus, aut traducta

unius verbi imagine totius sententiae informatio, pictoris cuiusdam summi¹⁰⁷⁾ ratione et modo formarum varietate locos distinguentis.

Iam quaeritur, utrum his verborum imaginibus usi sint, qui μνημονικὰ didicerunt, ad singula nomina tantum et singulas sententias retinendas; an etiam ad orationem ad verbum ediscendam.

Si legimus apud Ciceronem¹⁰⁸⁾: *Veruntamen neque tam acri memoria fere quisquam est, ut non dispositis notatisque rebus ordinem verborum aut sententiarum complectatur: neque vero tam hebeti, ut nihil hac consuetudine et exercitatione (sc. in ordine verborum aut sententiarum amplectendo) adiuvetur; si meminerimus loci Ciceroniani de verbis iis, quae similitudine nulla possint formari; si porro apud QUINTILIANUM¹⁰⁹⁾ inter ea, quae arti ab ipso obiiciuntur, haec invenimus: Sermonis alicuius habitus verborum contextus eadem arte quomodo comprehendetur? — — Nonne impediri quidem eorum quae dicit decursum necesse est dupli memoriae cura? Nam quomodo poterunt copulata fluere, si propter singula verba ad singulas formas respicendum erit? — si haec, inquam, legimus, probabile possit videri, non solum singula nomina difficiliter tenenda, aut sententias quasdam ad verbum recitandas, sed etiam totius orationis verba imaginibus notare solitos fuisse, qui arte mnemonica uterentur.*

At non est ita. Etenim CICERO¹¹⁰⁾ dicit, *verborum memoriam minus esse oratori necessariam: rerum memoriam propriam esse oratoris.* Apud

ex parte ad genus. Non memini quidem me legere quidquam de etymologia apud Rhetorem Herennianum, ubi omnium copiosissime de re mnemonica praecipit; et ignoro sane, an vel tum quum libros de Oratore scriberet, verbum *notatio* Cicero usurpaverit pro Graeco έργονολογία, qui in libro multo serius scripto, *Topicis* §. 35., necessarium duxerit indicare, se Graecum illud Latine dicere *notationem*. Nam ibi cap. 9. *Graeci*, inquit, έργονολογίαν vocant, *id est*, verbum e verbo, *veriloquium*: nos autem novitatem verbi non satis apti fugientes, *genus* hoc *notationem appellamus*, quia sunt verba rerum notiae. Quae e CICERONE repetens QUINTILIANUS I. 6. §. 18., nonnullos ait, vim vocis intuitos, originationem vocare. Geterum recte idem I. c. §. 31.: *Origo quoque aliquando declinatorum tenendi magis causa est, ut in Cicerone, Verrio, Aurelio, si debent inseri.*

107) Male hoc vertit KAESTNERI sedulitas (*Uebers. und Erklärung der drey Stellen v. d. Gedächtnissk.* p. 36.): „nach Art eines der größten Mnemoniker.“

108) I. c. §. 357.

109) QUINTILLIAN. I. c. §. 24. 25.

110) CIC. I. c. 83.

RHETOREM HERENNIANUM vero ¹¹¹⁾ memorabilis hic legitur locus: *Nunc, ne forte verborum memoriam, aut nimis difficultem, aut parum utilem arbitrere, et ipsarum memoria rerum contentus sis, quod et utiliores sint, et plus habeant facilitatis; admonendus es, quare verborum memoriam non improbemus.* Nam putamus oportere eos, qui velint res faciliores sine labore et molestia facile meminisse, in rebus difficilioribus esse ante exercitatos. Nec nos hanc verborum memoriam inducimus, ut versus meminisse possimus, sed ut hac exercitatione, illa rerum memoria, quae pertinet ad utilitatem, confirmetur; ut ab hac difficiili consuetudine sine labore ad illam facilitatem transire possimus.

Iam ista verborum memoria ex iis, quae prolata sunt, iudicanti non tam absurdum videbitur, quam visa est nonnullis ¹¹²⁾). Vere enim QUINTILIANUS ipse ¹¹³⁾): *Difficiliora debent esse, quae exercent: quo sit levius ipsum illud, in quod exercent: ut athletae ponderibus plumbeis assuefaciunt manus, quibus vacuis et nudis in certamine utendum est.*

Praeterea paullo aequius de verborum memoria artificiosa iudicabit, qui haec reputaverit. Primum, ut quae scripsimus, diutius fere memoria teneamus, quam quae aut legimus aut audivimus: quum ob alias causas, tum, quod scribentes maiori animi attentione in singulis quibusque verbis commoramur, atque accuratius distinctiusque ea animo informamus: sic fore, ut quae sint imaginibus notata verba, propter huiusmodi rationem altius firmiusque memoriae affigantur; praesertim quum ista verborum notatio difficilis sit, et, ut diutius in singulis quibusque haereamus, requirat. Deinde, istam similium verborum notationem, ut *testium* admonitionem imagine crumenae ex pelliculis *testiculorum* arietinorum factae quaesitam, ineptam prorsus et plane ridiculam ei tantum posse videri, qui non cogitaverit illas, quas SENECA *Rhetor* scite appellat *delicias memoriae* ¹¹⁴⁾). Quae res serias et

111) RHET. HERENN. III. c. 24.

112) Ut philologo eidemque paedagogo haud ignobili, FRID. GEDIKIO, qui artis Veterum mnemonicae mancam formam ex scriptorum locis minus accurate inter se collatis nec lanceatis aequa persensis fixuisse sibi videtur. Vid. eius librum: *Gesammelte Schulschriften*. (Berl. 1789.) p. 269. in Prolusione anni 1782., lectu etiamnum digna: *Gedanken über die Gedächtnissübungen*.

113) XI. 2. §. 42.

114) *Caprices Francogalli* vocant.

graves revocare conanti est intempestive nonnunquam molesta, similitudine autem singulari atque adeo ridicula opportune excitatur atque ipsa praesto est. Denique QUINTILIANO obiicienti, dupli memoriae cura nos impediri, nec posse copulata fluere, si propter singula verba ad singulas formas respicendum sit, ab artis magistro responderi posse, illas verborum imagines adhiberi nonnisi ut, quae ediscenda sint verba, altius menti affigantur, et si quid non statim in promptu sit, id excitetur: non, ut quando verba pronuncianda per se sponte recurrent, vel tum verborum imagines simul operose advocentur.

Verum enim vero tali defensione opus vix fuerit, quum certo probari nequeat, Romanum oratorem ad totius orationis contextum memoria tenendum unquam perpetuo istis verborum imaginibus esse usum; sed ex locis CICERONIS et RHETORIS HERENNIANI laudatis appareat contrarium. Singulis autem nominibus memoriae affigendis utilem omnino verborum notationem fuisse, vel QUINTILIANUS¹¹⁵⁾ iis, quae simpliciora de memoria ipse docet, concedit.

Dixi de *verborum memoria*, deque *omni artis mnemonicae apud Veteres natura et constitutione*, si unum hoc commemoravero. Mirari subit, quales ineptias excogitandi, quae Veteres adumbrata reliquerunt, apud Recentiorum non exiguum gregem ansam dederint; ita ut, quae per se non essent contemnenda, abusu fierent molesta ac putida, multoque minus ad yerae utilitatis fructum, quam ad inanis ostentationis speciem adhiberentur.

Sed quum a re non alienum videretur, nec lecturis ingratum, si pauca saltem de Recentiorum conatibus narrandi taedium haud defugissem: differre certe hoc praestabat, usque dum disciplinam Veterum modo expositam, praeter animadversiones, quibus passim de re iam existimassem, singulari examini qualicunque subiecisset.

115) QUINTILLAN. I. c. §. 30. 31.

PARS III.

DE VETERUM ARTE MNEMONICA SENTENTIA.

I. Nonnullis Veterum quid visum.

Quae de arte memoriae Veteribus nonnullis tradita supersunt, quum tam multa et clara non sint, ut liberi esse possimus ab omni suspicione artis non plane perspectae: quae aliis in rebus existimandis parum valet, auctoritas, hac in re nonnihil ponderis habere videtur.

Plures quidem Veterum ut artis patroni a recentioribus eiusdem magistris temere afferuntur.

Primum nonnulli provocant ad PLATONIS auctoritatem. Hunc Schenckelius negat hoc memoriae artificio caruisse, quum Hippiae nomine, qui posse se quinquaginta nomina semel tantum audita recitare gloriaretur, specimen artis ostenderit: quam ratiocinationem levitatis arguere supervacaneum est. Ac Plato quidem non sane probasse videtur illam, quae tum temporis ferretur, memoriae artem, quippe qui in *Hippia minore*¹¹⁷⁾ Socratem inducens, ut Sophistae vanam πολυπραγμοσύνην facete irrideat, illum inter alia cum εἰσωνείᾳ eleganti, at acerba, dicentem facit: καίτοι τόγε μνημονικὸν ἐπελαθόμην σου, ὡς ἔοικε, τέχνημα, ἐν ᾧ σὺ οἴει λαμπρότατος εἶναι¹¹⁸⁾.

116) LAMB. SCHENCKEL. *de Mem.* p. 13.

117) PLAT. *Opp.* ed. STEPH. T. I. p. 368.

118) Poteram Parte I. Sect. II. de Hippia addere, memoriam hominis vel in proverbium abiisse. Nam id patere ex ΑΕΝΕΑΣ ΓΑΖΑΕΙ *Theophrasto* p. 11. ed. CASP. BARTH., ubi Axithenus, secunda Dialogi persona, Εὐδαιμὼν εἶ, ἔπειτα, ὁ Θεόφραστος, ὅτι πολλῶν ὄντων καὶ ποικίλων τῶν παλαιῶν λεγομένων, οὐδέν σε διέλαθεν, ἀλλὰ πάντα διδάσκεις σαφῶς, ὡς αὐτὸς ἔξειγάν, οὐ τὰ τῶν παλαιῶν διεξίν, μνημονικὸς δὲ μᾶλλον τοῦ Ἰσπίου Ιφάνης, καὶ εὐκ ἀμελεῖτος.

Maiori quodam iure ARISTOTELIS auctoritatem laudant, in cuius libro de *Memoria et Reminiscentia* quaedam animi humani leges eruuntur, quibus ars mnemonica nititur omnino¹¹⁹⁾. Ad quam respicere Philosophus videtur libelli περὶ μνήμης καὶ ἀναμνήσεως cap. 2. his verbis: καὶ ἔστιν εὐμνημόνευτα ὅσα τάξιν τινὰ ἔχει, ὥσπερ τὰ μαθήματα τὰ δὲ Φαύλως, καὶ χαλεπῶς. — — ἀπὸ τόπων δοκοῦσιν ἀναμνήσκεσθαι ἐνίστε. τὸ δὲ αἴτιον ὅτι ταχὺ ἀπ’ ἄλλου ἐπ’ ἄλλο ἔρχονται κ. τ. λ.¹²⁰⁾, ubi illud ἀπὸ τόπων ἀναμνήσκεσθαι FRANC. VATABLUS vertit¹²¹⁾: *ex locorum dispositione reminisci.* Apertius etiam Philosophus artem respicit περὶ ψυχῆς libro III. cap. 3.¹²²⁾ verbis: "Οτι δούκεν ἔστιν η αὐτὴ νόησις καὶ ὑπόληψις, Φανερόν. τοῦτο μὲν γὰρ τὸ πάθος ἐφ' ημῖν ἔστιν, ὅταν Βουλώμεθα (πρὸ ὄμμάτων γὰρ ἔστι ποιήσασθαι, ὥσπερ οἱ ἐν τοῖς μημονικοῖς τιθέμενοι καὶ εἰδωλοποιοῦντες), δοξάζειν δούκεν ἐφ' ημῖν ἀνάγκη γὰρ η ψεύδεσθαι η ἀληθεύειν. Quae IOANNES ARGYROPULUS Byzantius interpretatur¹²³⁾: *Non idem autem esse imaginationem existimationem patet. hic enim affectus in potestate nostra sine controversia collocatur. licet nanque, cum libet, singere quicquid volumus atque ante oculos ponere, perinde atque ii faciunt qui in artificiosae memoriae comparatis atque dispositis locis imagines fingunt atque simulacra collocant. at opinari in nobis non est situm: necesse est enim opinantem aut veram aut falsam existimationem habere.* Consulto continentem orationem apposui, quo certius constaret, artem illam Simonideam bene notam Aristoteli fuisse. At ubi eandem disertis verbis comprobaverit laudibusque extulerit, nescium me praebeo atque edocendum.

119) Aristotelem de *idearum*, quam Recentiores vocant, *associatione* primum subtiliter disserentem praedicant Io. G. E. MAASS. in *Paralipomenis ad Historiam doctrinae de associat. idear.* (Hal. 1787., octonis) p. 11—18. et Cl. Io. AUG. GOERENZ. in docto libello: *Vestigia doctrinae de associatione* quam vocant *idearum* *libris Veterum impressa.* (Viteb. 1791., quaternis) p. 19—23.

120) ARISTOT. *Opp.* T. I. p. 452. ed. BEKKERI.

121) Ibid. in *Lat. varior. interpretum versione*, edita per Academiam R. Boruss. p. 233.

122) ARISTOT. *Opp.* T. I. p. 427. ed. BEKKERI.

123) Ibid. in *Lat. varior. Interpp. versione*, ed. Berol. p. 222.

Auctorem vero Rheticorum ad HERENNium ac CICERONEM arti mnemonicae admodum favisse, ex eorum scriptis persaepe in hoc libello laudatis habemus satis superque exploratum. Dici quidem possit, in libris *de Oratore* memoriae disciplinam adumbrare et commendare non Ciceronem ipsum, sed eum qui loquens inducit, M. ANTONIUM *Oratorem*; tamen ipsius de memoria oratoris iuvanda, eo saltem quo libros illos scribebat tempore, sententiam diversam fuisse a persona colloquentis, non facile quisquam contenderit, ne dum argumentis firmaverit. RHETOR quidem HERENNIANUS, quisquis fuit, omnium antiquitatis scriptorum qui supersunt, quam diligentissime artis naturam exposuisse censendus est, nec coeco tamen studio sibi tradita quaevi amplexus.

Non multo post exstitisse reor artis patronum SENECAE *Patrem*: tum ob singularem ipsius memoriam, haud scio an artificio sublevatam; tum ob ea quae narrat in Prooemio libri I. *Controversiarum*, quem locum supra dedi descriptum¹²⁴⁾.

QUINTILIANUS autem arti mnemonicae non omnem quidem abiudicat utilitatem, atque suis de memoria praeceptis utiliora quaedam ex ea assumpsit: plura tamen in ea graviter reprehendit, se simpliciora traditurum professus, quae quam fructuosa sint, usu vel hodie intelligens quisque experietur. Hoc quamvis libens agnoscam gratusque, idem haud negabo, artem fusius quidem quam a Cicerone, at brevius quam a Rhetore Herenniano, tractari per Quintilianum, imo in quibusdam leviuscule ab eo libari tantum; qui nonnulla a Cicerone, ut ipse fatetur, ad verbum transscripsit, alia non explicatius satisve distincte enarravit: nisi forte sumere malimus, in textu quem vocant quaedam olim esse turbata aut corrupta. Ut vel me adolescentem ante XLV. annos offenderunt XI. 2. §. 21. ista: *Etiam fingere sibi has imagines licet, ubi has imagines delendum esse suspicabar, quod malum interpretamentum de margine irrepisset.* Nempe in verbo *fingere* mente splendum erat *haec loca, non has imagines.* Quinque lustris post tandem egregium SPALDINGIUM nostrum vidi h. l. haerentem, qui in iis certe quae se-

124) Parte I. p. XIV. not. 50.

quuntur: *Imagines notae sunt, glossam a margine textum ingressam probe agnovit.*

Post hos PLOTINI auctoritatem afferunt¹²⁵⁾. Qui Enneade IV. libro VI., qui est de *Sensu et Memoria* (*περὶ αἰσθήσεως καὶ μνήμης*)¹²⁶⁾, de memoria et reminiscencia varie quidem satisque subtiliter suo more disserit: at de arte quadam memoriae nihil dicit.

E Veteribus, qui de eadem aliquid proferrent, nominandus etiam erat PHILOSTRATUS, non vero tamquam artis laudator, sed ut eius contemptor. Nam¹²⁷⁾ Τέχναι μνήμης, inquit, οὐτε εἰσὶν οὐτ' ἀν γένοιντο. μνήμη μὲν γὰρ δίδωσι τέχνας, αὐτὴ δὲ ἀδίδακτος, καὶ οὐδὲ μλα τέχνη ἀλωτός. ἔστι γὰρ πλεονέκτημα Φύσεως, η τῆς αἰδανάτου ψυχῆς μοίσα. κ. τ. λ.

II. Nobis quid videatur.

Veterum quorundam de arte mnemonica placitis perlustratis, nobis quid placeat, expromamus.

125) Ut Io. BRANCACCIO, Ictus Panormitanus, libro Panormi edito 1702. duodenis, qui inscrib.: *Ars memoriae vindicata*. Vid. *Acta Eruditor.* a. 1703. p. 66.

126) Opp. ed. FICINI (Basil. 1580. f.) p. 452. seqq.

127) PHILOSTRAT. de *Vitis Sophistar.* lib. I. p. 523. ed. OLEARII. Ceterum quae narrat de DIONYSIO *Sophista*, (qui Hadriani vixit aetate,) rumorem fuisse sparsum, quasi ille discipulos suos memoriae facultatem edoceret, quod fieri posse negat, quum memoriae ars nullo modo doceri aut comparari possit, vix memoratu digna hoc loco videbantur, nec temere Philostrati rationes plane fidelneas esse dixerat VOSSIUS de *Rhetoricae nat. et constit.* cap. 20. — Nec magis a me impetrare potui, ut in veterum artis magistrorum seriem reciparem MIMANTEM nescio quem, nec cuius aetatis, cuius breve fragmentum quoddam de memoria (*μνάμης*), Fragmentis quibusdam Pythagoreorum THOM. GALEUS adiunctum edidit in *Opusc. mythol., phys. et eth.* ed. Amstelaed. 1688. p. 731. Primum enim scriptoris nomen commentitium est, ut demonstravit Io. ALB. FABRICIUS in *Bibl. Gr.* Vol. XII. p. 617. vet. edit. Nempe Io. NORTH., qui fragmenta illa Latine vertit, tribuit Mimanti cuidam, quem novit nemo, ductus coniectura loco qui ap. Galeum exstat l. c. p. 722. his verbis: *Mīmās tīmī.* At in cod. MS., qui adseratur Cizae fuitque olim Reinesii, in quo istae disserrit. Sexto Emp. subiiciuntur, non legitur *Mīmās*, sed *μύστας* (initiatus). Locum ipsum Graece ex msto. nonnihil emendatus dedit FABRICIUS l. c. p. 634, 635. Quae HARLESIUS in nova *Bibl. Gr.* editione Vol. I. p. 853. apposuit, nihil continent quam quae sunt Fabricii. Addo hoc unum, quamvis leve, VALCKENAERIUM in praefat. *Ammonii* p. XXI. commemorare in MS., ubi *Mīmās* vulgetur, exstare *Mūmās*, quod nos ad lectionem Codicis Ciz. *μύστας* revocare mihi videtur. Deinde res ipsae quae ab ignoto illo docentur, partim brevissima admonitione constant, partim eiusmodi sunt, ut artificii nonnisi particula quaedam significetur.

Primum ars illa ad SIMONIDEM tamquam auctorem Veteribus relata, maiori vero probabilitate a Sophistis, ut HIPPIA Eleo, ni inventa, saltem imprimis exculta atque exornata, veris *idearum associationis*, quam vocant Recentiores, *legibus* nititur, ut non male philosophum elegantis doctrinae, ERNESTUM PLATNERUM¹²⁸⁾ iudicasse arbitremur, antiquos philosophos praecipuarum phantasiae humanae legum vim in *idearum progressum cognitam* habuisse et perspectam, id patere etiam ex Simonideae artis ratione.

Legum autem illarum hanc primam statuimus: *Quaecunque sensu tradantur, magis ferire et afficere mentem humanam, quam quae non nisi cogitando ei informentur.* Nunquam enim reminisciā tam vehementer moveatur mens, quam sensu eo, quem instaurat reminiscencia; quae quo clarius fideliusque sensum exprimit et repreäsentat, eo maiorem in mentem vim habet. Quo magis igitur sententias ad sensus referimus, eo firmius memoria eas tenere, eo facilius earundem potest recordari. Verissime itaque CICERO¹²⁹⁾: *Vidit hoc prudenter sive SIMONIDES, sive alius quis invenit, ea maxime animis affigi¹³⁰⁾ nostris, quae essent a sensu tradita atque impressa: acerrimum autem ex omnibus sensibus nostris esse sensum videndi: quare facillime animo teneri posse ea, quae perciperentur auribus atque cogitatione, si etiam oculorum commendatione animis traderentur, ut res caecas et ab aspectus iudicio remotas conformatio quaedam et *imago et figura* ita notaret, ut ea quae cogitando complecti non possemus, intuendo quasi teneremus.*

Imaginum igitur in memoria artificiosa usum lege quadam mentis humanae fulciri palam est.

128) *Philos. Aphorismen*, T. I. ed. L. a. 1782., p. 128. in annot. ad §. 421. et ed. II. a. 1793. annot. ad §. 334. p. 164.

129) *De Orat.* II. 87.

130) Hanc enim lectionem, quam edidit Pearcius e Ms. et edd. Steph. et Lamb., ediditque cum Schützio Orellius et O. M. Müllerus, praferendam dixi p. VII. not. 16. lectioni ab Ernestio retentae effungi. Nam si Ernestum sequaris, Cicero ex Simonidis mente ita ratiocinatur: „Quae a sensu animis nostris sunt tradita atque impressa, eorum imagines maxime perspicuae insunt. Atqui sensus videndi acerrimus est. Ergo facillime animo tenentur, quae auribus atque cogitatione percipiuntur, si etiam oculorum commendatione animis traduntur.“ Verum non recte concluditur haec ratio, nisi propositioni haec adiunxeris: „Quorum autem imagines maxime perspicuae animo insunt, eae maxime animis nostris affiguntur.“ Eamque sententiam primariam Ciceroni omissam iure miraremur. At plana sunt omnia, si legimus *affigi*, non *effungi*.

Post laudata Ciceronis verba haec sequuntur: *His autem formis atque corporibus, sicut omnibus, quae sub adspectum veniunt, admonetur memoria nostra atque excitatur: sed locis opus est: etenim corpus intelligi sine locis non potest.*

Iam igitur aliae quaedam animi humani leges, quas sequitur in nexu idearum, commemoranda, unde alterius, qua constat memoria artificiosa, partis, *locorum usus intelligatur.*

In locis magnam vim inesse admonitionis, fugit neminem. Si venimus in quaedam non sine causa nobilitate spatia, recurrit memoria paeclarorum hominum, quos ibi multum versatos esse accepimus¹³¹⁾. At non solum in loca quaedam venientes eaque intuentes, sed etiam, loca cogitatione representantes, rerum olim ibi perceptarum solemus meminisse. Itaque si quando rei cuiusdam, quae olim nobis accidit, clarius atque accuratius reminisci volumus, locum ubi essemus tum quum res accidisset, in memoriam revocamus; eiusque admonitione adiuti, facilius reperimus quod quaerimus. Ut, si quae in libro multum nobis tractato olim legimus, eorum volumus reminisci, paginarum et versuum prope ipsorum recordamur, horumque ope admonemur. Atque idem fit in memoria artificiosa *locis*, in quibus rerum memorabilium imagines sunt collocatae.

Generalem vero nexus idearum¹³²⁾ legem, qua *localis* quam vocant *memoria* nitatur, investigando inveniemus hanc: *Eodem tempore quas hau- simus, ideae, in mentem simul recurrent.*

Ex hac igitur lege generali, atque ex altera illa: *Quo ordine olim in mentem venerunt ideae, eodem redeunt deinceps, tertia efficitur lex: Si non duas tantum ideas, sed duas idearum series cogitatione connectimus, atque hunc nexus identidem repetimus: tum fit, ut utraque series vinculo tam arto cohaereat, ut altera repetita sponte excitet alteram.* Atque huic potissimum legi psychologicae ars Veterum mnemonica inniti videtur.

Recte enim QUINTILIANUS¹³³⁾: *Ex alia memoria venit alia, ut quum*

¹³¹⁾ *Elegantissimam CICERONIS de Fin. libri V. init. disputationem relegas quae- so.*

¹³²⁾ *Ideas hic dici patet sensu pervulgato philosophorum aevi recentioris, non eminen- tiori illo, qui Philosophiae vere Platonicae proprius perhibetur.*

¹³³⁾ *Instit. Or. XI. 2. §. 30.*

translatus annulus vel alligatus commonet nos, cur id fecerimus. Neque id valet de duabus tantum ideis, sed etiam de duabus idearum seriebus. Nam orator si cogitatione identidem coniungit cum primo loco primae partis orationis suae argumentum, cum secundo partis secundae: sequitur ex altera lege generali, ut primus locus in memoriam revocatus ceteros locos eodem, quo in memoriam venerint, ordine revocet; ex altera autem lege generali, ut quisque locus id argumentum alicuius partis orationis, quod cum eo coniunctum est, et simul imagines in eo collocatas, unaque sensus qui imaginibus exprimuntur, excitet; ut igitur locorum serie totius orationis sententiae revertantur deinceps.

Ne quis vero dubitet quin, si utriusque seriei nexus satis crebro repetitus sit, haud aegre altera alteram suscitet: admonetur, quam facile consuetudinis vi sonorum quorundam auditio aut litterarum quarundam aspectus sensum, quem utrumque notat, in audientis legentisve animo effingat.

Apparet igitur, memoriae disciplinam ex veris de animo humano notiobus esse profectam. Quam idonei autem ad reminiscientiam adiuvandam loci sint, vel hinc intelligitur. Multo celerius in mentem revocare valemus locorum quorundam conservatorum ordinem, quam totidem sententiarnm. Causa est, quod locos quos memoria tenemus, ut res adpectui subiectas, velocissime et uno quasi obtutu contuemur, sententias deinceps tantum ex memoria promere contingit, quia alia aliam quasi obtegit atque occultat.

Quoniam ex veris animi humani legibus mnemonicam esse ductam demonstratum est, eadem possit mihi valde videri approbata. Ac sane propter id ipsum, quod veris animi legibus est superstructa, rem equidem ut despiciam, nequeo moveri. Oratori certe, ad cuius usum olim maxime accommodaretur¹³⁴⁾, aliquatenus utilis erat, praesertim quatenus ad orationis partes una cum singulis capitibus ex ordine repetendas valeret. Praeterea profuerit, ut iam QUINTILIANUS censebat¹³⁵⁾, ubi rerum nomina multa audita per

134) Oratori memoriae fructum esse uberrimum, accurate docent CICERO *de Or.* II. 87. init. QUINTIL. XI. 2. §. 1—3. Conf. CIC. *de Or.* I. 5. *de opt. gen. orat.* c. 2.

135) QUINTILIAN. I. c. §. 24—26.

ordinem reddenda essent, in oratione puto qualis Verrina de signis: minus in ediscendis, quae orationis essent perpetuae. Atque omnino parum recte fuisse institutam artis rationem arbitrabar in eo, quod nimia esset praeceptorum multitudo. Hoc autem cadit imprimis in verbo: um imaginibus notandorum modum, qui, etiamsi non tam ad usum oratoris compararetur, quam ad eius exercitationem, ut ad difficiliora assuefactus faciliora expeditius facere posset: tamen haud scio, annon fructu tempus et opera fierint compensata. Omni quidem apud oratorem caruisse artem utilitate quominus negem, impedit tum summa ipsius ratio, tum gravis CICERONIS eam minime aspernantis auctoritas. At rationem adhiberi posse et expeditorem et potentiores auctor est, ut diximus, QUINTILIANUS, experimentis, quod ipse testatur¹³⁶⁾, edoctus; cuius de memoria exercenda praecepta eaque multo simpliciora, usu quisque facile sibi probabit.

Praeter oratoriam artem ex artificiosa memoia fructum praecipuum capi posse negabo, donec contrarium ratione non nagi quam experientia fuero edoctus. Etenim eiusmodi quales ex artis praeceptis sibi comparabant oratores, locis in disciplinis philosophicis, quoniam in his principiis recte constitutis et connexis omnia derivari oportet, opus non est. Ad singula autem tum in iisdem, tum in aliis disciplinis, et firmius animo tenenda et facilius reminiscenda sufficient, opinor, collectaneorum et adversiorum libri prudenter dispositi, quo referamus, quidquid ad doctrinam quandam pertinens vel lectione aut auditione accepimus, vel ipsi ex cogitavimus.

Imagines autem illas in doctrinis quae philosophiae anumeantur, quum hae in scientia eorum quae sensibus subiici imaginibusve exprimere possunt, tradenda potissimum versentur, supervacanas esse patet¹³⁷⁾. Sed etiam in ea quae ad memoriam et phantasiam maxime dirigitur, cognitione *historica*, ambitiosam istam imaginum praceptionem spernet mente validus.

136) QUINTIL. l. c. §. 53.

137) Conf. VOSS. de Rhet. nat. et constit. p. 128.

EPIMETRUM I.

DE RECENTIORUM ARTE MNEMONICA.

Constatbat ea, quantum et ipse cognovi ex pluribus hac de re libris, quos adolescentes olim impigre evdvi, eisdem, quibus Veterum ars, partibus: locis et imaginibus; eademque omnino ex Veterum arte ducta erat et profecta. Sed quaecunque ad eam excolendam, eiusque usum amplificandum addiderunt, aut Veterum significationibus male intellectis, aut nivis argutiis excogitatis iisque infinitis, ea tantum non omnia homini naturalium virium sibi conscio, temporique suo provide parcenti, inepta videbuntur serioque studio antiquam digna¹⁾.

Pro locis utebantur potissimum aliquot domorum cubiculis²⁾, ita ut cuiusque cubiculi unoquoque pariete, quem rursus in certas partes dividerent, magnum apponenter imaginum numerum, quem omnibus modis multiplicare conarentur. Quidam etiam corpus humanum, ac manus praecipue adhibebant, in iis ingentem locorum copiam querentes³⁾. Alii ad numeros potissimum memoriae affigendos alphabeti litteras, consonantes a vocalibus strenue separantes referebant, ut saeculi XVII. vaniloquus circulator⁴⁾, JO. JUSTUS WINKELMANNUS.

Artem vero suam non applicabant maxime, ut Veteres faciebant, tamquam oratoris adminiculum: ad omnes omnino disciplinas ediscendas, quarum paratis notionibus promptisque cubiculorum multitudinem referiebant, adeoque tota castra temere implebant, atque etiam ad quaslibet res memoria continendas imprudentissime usurpabant⁵⁾.

Cum illa locorum et imaginum disciplina, quam *Mnemonicanam topicam* appellabant, coniungebant nonnulli *Mnemonicanam logicam*, vel, quae ab ea non multum absuisse, latius tantum patuisse videtur, *Artem Lullianam*, quae, suo tempore Europam pervagata, eadem *Ars magna* vocaretur. Hanc ordinem doctrinæ internum, ex rebus ipsis sumptum, illam ordinem rerum qualiumcunque ex ordine locorum depromptum observare dicebant⁶⁾. Et fuit sane in utriusque artis coniunctione alterius comitatu

1) Vide mihi imprimis ea, quae in Recentiorum libris de *verbis* memorias mandandis traduntur, praecipue caput de *vocabulis* non *intellectis*.

2) Conf. LAMB. SCHENCKEL. de *Memoria* lib. II. c. 1. aliosque.

3) Conf. IO. AUSTRIACUS de *nem. artificiosa*. Tract. I. c. 3., vel potius F. HIERONYMUS MARAFIOTUS de *arte reminiscientiae*, ubi repertis manuum cum locis figuris ligno insculptis.

4) Hac enim appellatione digna videtur homo, vel secundum ea quae de eo arbiter iusto lenior refert, ARETINUS p. 370—383.

5) Vid. SCHENCKEL. I. c. cap. 6. et 8. Sed fortasse praestet est commodius libellus: *Compendium der Mnemonik*. Aus dem Anfange des XVII. Jahrh. von LAMPK. SCHENCKEL und MART. SOMMER. A. d. LAT. mit Vorr. und Ann. von D. JOH. LUDV. KLÜBER. Erlangen, 1804. Octonis.

6) Vid. IO. HENR. ALSTEDII *Systema mnem. minus* p. 70. Conf. eiusdem *Trigae canonicas*. FRANCOF. 1612. octonis, cap. II. Seduli hucus Alstedii (non nihil fere protulit: casu ad manus olim mihi erant hominis opuscula) illius igitur *Systema mnemonicum minus et maius*. FRANCOF. 1610. octonis, et *Trigae canonicae* eiusmodi sunt libri, ubi talis copulatio facta sit. RAYMUNDI LULLI quidem ieiunas notionum fundamentalium tabulas nunc mitto. At de IORDANO BRUNO, Nolano, tacere non possum, qui Lullianam artem quoddammodo nobilitavit singulari sua disserendi ratione a tenebris quidem non seiuincta: homo miri ingenii, qualia singulis saeculis vix singuli nascentur, doctrinae sueae, quae in magnis aevi captum superaret, fervidique animi, quem non ferret adversariorum malignitas, Mariy; iam BAYLIUS ac LEIBNITII, tum nostra potissimum aetate praestantissimorum philosophorum quantumvis dissentientium, JACOBI ET SCHELLINGII, existimatione suam tandem nactus dignationem. Quae vero idem ille ad memoriam iuvandam molitus est, obscuris lucida miscendo, ea insigni, quod sciam, apud aequales caruere successu. Quod nemo mirabitur, qui reputaverit, Arte Lulliana et Mnemonica, ut aevi ingenium postulabat, etiam Brunonem Lutetiae Parisiorum aliquique in Universitatibus litterarum multis ad se auditores allicere studuisse; sine dubio, quo facilis tali progymnasmate propriis egregiae mentis sua repertis, longe ultra vulgus doctorum sapientis, apud discipulos discandi avidos viam sterneret introitumque pararet. Conf. optimum TENNEMANNUM nostrum (*Gesch. der Philos.* T. IX. p. 388) Quae de Brunone ARETINUS operose et prolixie denarrat in *Artis mnem. hist.* p. 215—275.; multis verbis rem parum declarant, maximamque partem hue non pertinebant.

altera digna, quum famosae Artis Lullianae magistri docerent disserere de omni (ut aiunt) scibili; mnemonicae autem artis professores discipulos instituerent maxime, ingentem vocabulorum numerum nonnisi semel auditorum ex ordine recitare. Nam de artis memoriae apud Recentiores ostentatoribus intelligens quisque subscribet magni BACONIS VERULAMII⁷⁾ gravissimae sententiae: *Ingentem numerum nominum aut verborum semel recitatorum eodem ordine statim repetere — nos non maioris facimus, quam funambulorum et mimorum agilitates et ludicra: etenim eaedem ferme res sunt; quum haec corporis, illa animi viribus abutantur; et admirationis forsitan aliquid habeant, dignitatis parum.*

EPIMETRUM II.

DE ARETINI OPERE MNEMONICO.

ARETINI liber⁸⁾, plus quam DCC paginas formae octona⁹⁾ maioris implens, in bibliothecis servatur; praeter eos qui historiae litterariae sunt curiosi, perpauci evolunt; auctoris quidem methodus parum diversa, saltem non nisi in rebus secundariis, ab illa quam sequentur artis mnemonicae saec. XV. XVI. XVII. praecones. Laudem certe, quam apud eruditos, famamque quam in vulgus mnemonicae nova instauratione aucuparetur, commenta ab ipso prolata haud poterat tueri, quamvis philosophiae cuiusdam popularis et apparatus litterarii copiis uniusque congestis et corrasis exornata. Quodsi, quem multa industria, aliqua solertia et quodam acumine praeeditum fuisse haud negaveris, eundem insigni eruditione atque in orrupo iudicio omnino caruisse dixeris, profecto tu impie haud laeseris sententia iniqua defuncti manes.

Quod in Prooemio operis p. V. iterum promisit opus natus¹⁰⁾, et quidem ut a se absolutum, cuius epitome sit opus a typographo descriptum, id nunquam vidi lucem. Praefatio (p. 2 — 8.) libri primi, quo continetur quam vocat: *Theorie der Mnemonik*, subscripta est Monachii m. Novembri 1805. Totus vero liber I. nonnisi 24 paginis (p. 9 — 32.) constat, parum plenis, ad verbum repetens Aretini libellum, quem prae-miserat inscriptum: „*Denkschrift über den wahren Begriff der Mnemonik oder Erinnerungswissenschaft*. München, 1804;“ atque etiam: „*Kurzgefasste Theorie der Mnemonik*. 1805. Nürnb. und Sulzbach.“ Quisquis autem, quaecunque philosophi, rhetores ac paedagogi de memoria egregie disseruerunt, proœ cognita habet et per-pensa, eum breviter proposita illa Aretini ratio nihil prope docuerit, quod legentem iuvare, nedum rem ipsam augere possit. Pag. 3. dicit, post librum primum impressum iri partem III., quae datura sit *Historiam scientiae mnemoicae*; tum demum partem II. *Praxin et Criticam* eiusdem. Posuit tamen librum II., cui inest *Praxis*, 168 pa-ginis, statim post lib. I. Quod in ea imagines primum spectat, tum demum locos, hoc ordine inverso, et locis non tantum tribuens, quantum conveniebat, et imaginibus arbitrario sumptis nimium, in eo Veterum mnemonicam censendus est, ne quidem arbitrio, haud emendassem. In eodem libro secundo multa Aretini exempla praeceptis il-lustrandis addita, secus ac speraverat NIEMEYERUS¹¹⁾, nibilo sunt melibra, quam ab-sossa et putida ista, cuiusmodi non solum apud Scheickelium aliasque Saec. XVII. mnemonicos, sed nostra etiam aetate apud Kaestnerum frequentissime dprehenduntur, quorum specimina nonnulla gravis errorum in re paedagogica censo, Niemeyerus ipse, singulatum digne ac merentur notare non superacaneum duxit. Terissime enim KAVTIUS¹²⁾ in artificio mnemonico per phantasiam effrenam consociata reprehendebat, quae non sub eadem notione naturalique idearum associatione essent coniuncta; contradictionem severe notans, qua offendamur in proposito, reminiscente difficultatem minuendi augendo eo quod sit mente capiendum memoriaque tenendum. Quod confir-mat etiam Niemeyerus l. c. p. 466. 471., methodorum discendi sarus existimator.

7) *De Augm. Scient. lib. V. c. 5. The Works of FRANC. BACON. Vol. III. Lond. MDCCLIII. form. max. p. 103, 104.*

8) *Systematische Anleitung zur Theorie und Praxis der Mnemonik, nebst den Grundlinien zur Geschichte und Kritik dieser Wissenschaft von J. CHA. Freibern v. ARETIN. Mit drei Kupfertaf. Sulzbach, 1810.*

9) *Ausführliche theoretisch-praktische Anleitung zur Mnemonik.*

10) *Grundsätze der Erziehung und des Unterr.* Pars I. ed. IX. a. 1834. p. 49. Concl. ibid. p. 471.

11) *Anthropologie*, p. 94.

Qui aequo arbitrio nobiscum agnoscit utilem GRAEFFII operam praestitam disciplinae memoriae in libro catechetico¹²⁾.

Liber III. 532 paginis exhibet *Historiam Mnemonicae*. Ibi antiquiore partem ut rebus alienis praeter modum amplificatam, ita parum critice tractatam¹³⁾, nemo, quamvis impensa ab auctore opera facile animadvertisatur, eius eruditio et perspicaciae invidebit. Ex medio aevo multa tradere non potuit. Recentiorum vero Mnemonicam, inde a saeculo XIV. exorsus, usque ad nostram aetatem, excerpendo et notando, singulisque scriptoribus reique doctoribus laudandis passimque et diligentius perlustrandis satis gnaviter persecutus est, copiosior certe et plenior MORHOFIO in *Polyhist.* l. c., aliisque qui praecesserant Aretino. Exhibit vero omnis, quam *Mnemonicae Historiam* inscripsit, collectaneorum vel prolixo effusorum, vel librorum et libellorum nonnisi titulos annumerantium, indigestam molem potius, quam pragmaticam disciplinae historiam.

Atque his censuram haud morosam de Aretini opere egisse nobis videmur, quod quo tempore in lucem prodiit, publicos iudices aut nactum est nullos, aut, iusto, ni fallor, longe indulgentiores; vel causâ non satis cognitâ, vel non severe examinata.

Unum, licet reluctatus invitatus non silebo. In *Historia Mnemonicae honorificam* mei mentionem fecit Aretinus p. 80. 498. 531. 532. Quae suo tempore legi subridens, quandoquidem meam non latebat simplicitatem callida Viri urbanitas. Qui etsi serius per me acceperit *Commentationis* meae, quae sola tum divulgata esset, Partem primam (ut ipse narrat p. 532., mense Octobri extremo anni 1807.): quae potissimum continerentur libello, antequam scriberet suam ipse *Mnemonicae Historiam*, iam a. 1805. cōpēreire poterat, imo comperit, per HEYNII, BECKII Censorisque Ienensis ex meo libello excerpta¹⁴⁾, et latas de illo eorundem sententias. Aretini hac in re candorem an desideraverim si quaeritis: alii potius, ut de Viri suo tempore non solum nobilis sed etiam noti candore, comparatis quae scripsimus, prior ego, post vero ille, praestabit reliquise. Iidem in Aretini *Addendis* libri III. cap. 2. ad ea quibus BURMANNUS et WYTENBACHIUS notantur, aliaque eiusmodi, an ex meo tacitus hauserit fonte, si res tanti videbitur, iudicent.

Libro IV. quae continetur *Critica Mnemonicae* p. 533 — 566¹⁵⁾, nostrae denuo criticae subiicere, post omnia quae significavimus, taedet. Si quis vero sobrie philosophantem de arte quavis mnemonica audire velit, me suassore adeat FRID. AUGUSTI CARI, Professoris quondam Lipsiensis, *Opp. postuma*, à Cl. Handio edita Lipsiae 1808., *Psychologiae* Parte I. p. 217. seq. de memoria disserentem deque arte memoriae universe, p. 232 — 241. Ad cuius normam Aretini rationem si exigas, nae illa ab eo quod sapere ausi quaerimus, mirum quantum distare reperiatur.

EPIMETRUM III.

DE VOLUMINE QUODAM ANECDOTO ARGUMENTI MNEMONICI.

Vacui fugae debentur quae sequuntur Libellis quibusdam mss. de memoriae arte, quos vel descripsit vel memoravit Aretinus p. 132 — 156, quorum antiquissimum prioris dimidiae saeculi XV. esse tradit, addatur volumen membranaceum, quod in mea

12) Laudato supra p. I. not. 6.

13) Vid. caput Aretini de *Mnemonicae* in Oriente origine; cap. de eiusdem inventione Graecis abnegata, ibique de SIMONIDE CEO; cap. de *Mnemonica Pythagorae* etc.; locum de XENOPHONTE p. 60, 61, in cuius *Oeconomico* cap. 9. §. 11., ut scilicet Socratis aetate Ars quam late sparsa fuerit per Graeciam, demonstrat, promae ($\tauη \tauαμις$) domesticae eandem tribuere non dubitat: $\eta \tauο \muνημονιδη μαλιστα \delta\delta\delta\delta\delta\epsilon \epsilon\chi\epsilon\epsilon\epsilon$. Quod quum ab omnibus fere interpretibus recte intelligatur: quae memoria plurimum valere, seu memoriae facultatem plurimum habere videretur, ecce Aretinus nos docet, vel promam domesticam in Arte memoriae plurimum valuisse. Mitto, quae de ignoto MIMANTE, Pythagoreum quem putat, tradit p. 55.; mitto Procopii cum AENEA GAZAEO malam permutationem p. 59.; quae de METRODORO Scepsio temere coniicit p. 70; quae de PHILOSTRATO, fieri non posse, ut idem sit Vitae Apollonii Tyanaei et Vitarum Sophistarum auctor, se probasse p. 77. sibi persuasit, levioribus rationibus inductus; aliaque huiusmodi plura.

14) Conf. huius scriptorius Prooem. p. III.

15) „Kritik der Mnemonik, enthaltend die Grundsätze über die rechte Anwendung dieser Wissenschaft, und eine Untersuchung der Einwürfe gegen meine Methode.“

servo bibliotheca. Id dono mihi misit a. 1805., post editam partem I. Commentationis meae, Vir litteratissimus, H. L. C. BACMEISTER, Eques, Aug. Rossiar. Imp. a consil. publ., Academiae Imp. doctrinar. Petropol. olim Bibliothecarius. Adiecit vero brevem descriptionem, quam ipsius verbis apposui ¹⁶⁾.

Versu 10. legitur: *Memoria vero artificialis est sciencia (sic) — — — — — ex locis et ymaginibus — — — subtiliter adinuenta.* Vs. 13. *Partes huius artis substantiales sunt due, locus et ymago.* Vs. 371—382. *de historia artis refertur: Est ergo sciendum, quod ista ars primitus inuenta fuit Athenis per Demetrium phm eloquentissimum.¹⁷⁾* — Vs. 53. seq. et 99. seq. *siglae variae, eaque satis simplices, quarum ope locos melius distinguere volebant.* — Vs. 366. *Primo de locis, secundo de ymaginibus est dicendum.* Iam multa de locis sequuntur, non plane abhorrentia ab illis quae leguntur apud Rhetorem Herennianum, Ciceronem etc. — Vs. 361. *In memoria artificiali est locus sicut carta (sic), et ymagines sicut literae.* Sed istae ymagines delentur, et locus semper stat, sicut illi qui scribunt super tabulas, quem scripserunt totum, tunc removent literas, ut tabula remanet alba apta ad scriendum de novo etc. Vs. 367. seq. *semper debes notare quintum locum, et capere ista loca ad quinarium numerum.* — Vs. 372 seq. *Quandoquidem multi philosophi conati sunt, istam artem declarare, tamen melius et subtilius declaravit tullius perfectissimus orator in libro rethoricorum (Rheticorum), licet astuto et subtili modo, in tantum, quod nemo per ipsum valeat scire, nisi per divinam graciā (sic) vel per scientem, qui doceat qualiter debeat.* Vs. 383. seq. *sermo de imaginibus.* Ibi multa huiusmodi, ut vs. 386. seq. *Ego volo recordari istius nominis Petrus, debeo reverti ad primum locum meum, et cum oculo meo mentali invenire unum Petrum, quem cognosco, et ponam in loco, qui faciat vel exerceat aliquem actum extraneum vel inusitatum, ut puta si interficiat hominem vel osculetur mulierem, vel aliud huiusmodi; et talis ymaginacio (sic) vocatur ymago.* Vs. 429. seq. *Si vis recordari istius textus Virgilii: Conticuere omnes, intenti ora tenebant; pone in loco tuo unum qui praedicat, et homines stant attenti ad audiendum et respiciunt eum; et sufficit.* — In fine totius voluminis legitur: *haec de memoria sufficient.* Reliqua non maioris momenti, sed fere ut in vulgaribus huiusmodi enhiridiliis non paucis.

16) „Kurze Beschreibung der alten Lat. Handschrift, betreffend die Gedächtniskunst.“ Diese Handschrift ist eine . . . pergamentene Rolle, von welcher der Antang, vielleicht mehr als Eine Zeile, fehlt. (Sie ist 3 Werschok breit, und, so viel von der Schrift noch vorhanden ist, 2 Arschin 9 1/2 Werschok lang. Die noch vorhandenen 439 Zeilen habe ich zum bequemern Gebrauch numerirt. Der Inhalt ist eine Anweisung zur Gedächtniskunst. — — Auch wird ermahnt, diese Kunst geheim zu halten.“ Hoc scripsit BACMEISTERUS Petropoli d. 12. Jun. 1805. Humaniter insuper addidit mst, quantum legere potuit, apographum. Quod confecit ferme a. 1779.

17) Estne philosophum, ut Bacmeisterus putabat, an Phalereum? Compendio quidem scripturae prius probabilius. Ceterum nomen antiqui inventoris non raro huiusmodi medii aevi scriptores, alias aliud, captarunt ex vano rumore.

Pag. IV. lin. 11. malim Ὀγδοκοντάρει, ut est p. VI. lin. 15. — Pag. IV. lin. 6. post διάσταυ. pone Comma.